

f 3658
2

ამოღის, ნათღეზა!

ღა

სსვა მოთხროზევი

ჭაჭა-ფჭაველასი.

ტფილსე.

სტამბა «ცნობის ფურკლასა» (მ. ზუნიათ).

1898

Дозволено Цензурою, 4-го Мая 1898 года. Тифлисъ.



ამოდის, ნათლები!

(მოთხრობა)

მინ ამბობდა ამას? სად ან როდის? ლამეა-
 თოვლით გადალესილა მთა-ბარი; სულ-შეხუ-
 თულია, ისე შებოჭილი, რომ დედა მიწის ძვლებს
 ქყრიალი, ქახქახი გააქვს. ბუნება თითქმის კუბო-
 ში წევს, სუდარაში გახვეულა. არაფერი ხმა,
 არც მოძრაობა, არც ცელქის მთის ნაკადულის
 ჩხრიალი არსად ისმის. ნიავეიც განგებ შეჩერებუ-
 ლა, რომ არ დაარღვიოს გარეშემო მშვიდობია-
 ნობა, არ დაუშალოს ბუნებას ძილი, განსვენება.
 ტყე დაბარდნილა თოვლით, ხეებს ტანი და ტოტე-
 ბიც აღარ ეტყობათ... აი ამ დროს ერთ კურუმს
 გორაზე მგლის ჯოვი გროვდებოდა. ზოგნი მო-
 სულიყვნენ ადრე და სხვების მოლოდინიც ჰქონ-
 დათ. ყმუილით, ნელის ბოხის ხმით აუწყებდენ
 ამხანაგებს: „მოდით, ნუ დაიგვიანებთო!“.

ქვეიდან, შორს სოფლიდან გაურკვეველი
 ჟრიამული ისმოდა; სახლებიდან ამონადენი ბო-
 ლი ნისლათ, ჯანლათ ზედ გადასწოლოდა სოფელს

საბნათ ეხურა, მალღა ცა გავარვარებული, ვარ-
სკვლავებით მოქედილი, ხოლო პირ-მოკუმული,
გაშტერებული დასწერებოდა დედა-მიწას.

მგლები ამაღამ სოფელს უნდა ესტუმრან —
ესაა მათი ფიქრი და განზრახვა. თას იმტომ
იყრიდენ ერთათ, რომ ტყეში აღარაფერი ეგუ-
ლებოდათ საკმელი. ერთი კვირაა მშვივრები და-
ლასლასებენ, მიწასაც კი ველარა თხრიდენ საკმე-
ლათ თოვლისა და ყინულისაგან. მოგროვდენ, დი-
დი ჯოგი გაკეთდა, ყველანი კბილებს აკაწკაწებ-
დენ, შიოდათ, ძალიან შიოდათ! ერთმანეთს ათ-
ვალეერებდენ და ნატრობდენ, ერაჲს მეორის ტან-
ზე ერთი წვეთი სისხლი მაინც შეენიშნა, რომ
აჲით საბუთი ჰქონოდათ ძგერებოდენ და თვისი
იანა-მოდჲე ლუკმა-ლუკმა გაეგლიჯათ. რომელს
ერთს ეყოფოდა ერთი მგელი, თითო ლუკმა ხომ
არც კი შეხვდებოდათ! არა, ცოტათი მაინც შიმ-
შილის ეინს მოიკლავდენ. X

საგულისხმო სანახავი იყო ამ დროს ველ-
ბის კრება: ზოგი იწვა თოვლზე. სხვა დაყინტე-
ბულიყო, რიგიც იღვა ფეხზე კუდებ-დაშვებული,
ხოლო ყველას პირები ჰქონდა დაღებული. ასე
თათბირობდენ თარეშის ლაშქრობის შესახებ.

— კარგი დრო გავიდა, კარგი, ბიჭებო!
როვორ ბნელა! აბა, ეისაც იმედი აქვს თავისა, ეხლა
უნდა ეცადოს, — ამბობდა მოხუცი მგელი ტოტია.

— ოღონდაც, ოღონდაც, — თქვა მეორემ, —
თუ სხვას ველარას მოვიგდებთ გარეთ, ძაღლები
მაინც მოვიტაცოთ. ხომ იცით ჩემი ამბავი? თქვენ
ჩავასათრებთ, მე გამოვიტყუებ, გავუთამაშებ, ჩავუკე-
დებ და მათი ქედანას, შემოგადებთ ზედ და
მაშინ თქვენ იცით როგორც გაირჯებით!

— რა შვილებმა არ ვიცით ჩვენც, როგორ
უნდა ჭამა ლეშისა. — თქვეს სხვებმა სიცილით.
თათბირობდენ ფარების გატეხაზე. ცხვრის მოგონე-
ბაზე ყველამ დაღებული, ცეცხლით ანთებული
ლაშები უფრო დაადეს და ნაკვერჩხლებათ გამოა-
ჩინეს დიდრონი კბილები. გაჰკრეს, გაუსვეს კბი-
ლი-კბილს: აჩქამდა კბილები და საერთო, საში-
ნელ ცეცხლათ დაენთო, არე-მარე გაანათა.

აიშალენ იმ იმედით, რომ გაძლებოდენ, დაე-
შვენ თავქვე, წინ ჩაუძღვას ტოტია, წალიკი და-
აკრეს გორის პირს — ჩამოწკრივდენ, იმედი უღ-
ვიოდათ გულში, მაგრამ დახეთ, რომ ბედმა უმუხ-
თლა. რასაც არ მოელოდენ ის მოხდა; მოხდა ის,
რითაც იმათი საქმე ფუჭდებოდა, იშლებოდა; წე-
ლი მოსწყდათ. რა მოხდა განა ასეთი? ამათ სიბნე-
ლის იმედი ჰქონდათ ხომ, მაგრამ ცოტათ შენი-
შნეს რომ აღმოსავლეთით ცის პირი ნათდებოდა.
ყველანი შეჯგუფდენ ერთად და მოიყარეს იქით
თვალეები. ცოტა ხნის შემდეგ მთვარემ წვერი
ამოჰჰყო. ამოვიდა მთვარე და გაანათა ტყე, მთა,

ბნელი კუნძულები; გაანათა ჯურღმული. შე-
ჯგუფებული მგლები ბრაზ-მორეულნი იძახდნენ:
„ამოდის, ამოდის, ნათდება!“ მთვარისაკენ მი-
პყრობილ მგლების თვალებიდან ზიზღით სავსე
ვილის ძიების ისრები იყო გადაფულდნისგან ბორო-
სწყევლიდნენ მის ამოსვლას!

ვაგიხმეს ფეხი, გაგიწყრეს ღმერთი! ვაი
შენ, ვაი შენ გაჩენის დღეს!—ამბობდნენ მგლები
და თან კბილებს უღრქენდნენ: „ახ ნეტავი, ხელ-
ში კი ჩაგვაგდებინა, შეგვაჭამა, რომ მოგვესპო
მაგისტვის სიცოცხლე“. ყველაზე უფრო წყრებო-
და, ბორგავდა ერთი ბებერი მგელი.

— ბევრჯელ მომიკალ გული, — ამბობდა იგი,
— ბევრჯელ დამალონე შე წყეულო, შე შეჩვენე-
ბულო: ბევრჯელ დამალონე, გამიმწარე სიცოც-
ხლის დღენი. ბევრის ცხოველის სისხლით ბევრჯელ
შევიღებე ცხვირ-პირი, ტოტები და მკერდი; მთელ
ორ კვირას დაეშვენებივარ ამ სისხლსა და ჩემ
ტანზე მისი დანახვით სიყმილის ყინი მომიკლავს.
ნეტავი, მთვარე, ერთხელ შენთვისაც გამესვა ჩემი
ბასრი კბილი, ნეტა შენის სისხლითაც დაეშვენებინა
მხარ-ბეჭი და თათები ლეგ-ჩოხა: ბიქს ტოტისა,

დანარჩენებიც ამასვე ფიქრობდნენ, კვლავ ლაშ-
დაღებულნი და შეჩერებოდნენ მთვარეს. მთვარე
კი ამოდოდა ზევით და ზევით, ამომალდა ცა-
ზე; გაანათა ტყეში ხისა და კლდის ძირები, ბნე-

ლი, ხევები, აგრეთვე გაანათა სოფლათ ბნელი კუნძულები ციხე-კოშკებისა და ძველთა შენობათა ნანგრევებისა, სასაფლაოს შავ ქვებს თავის სხივის სანთელი დაუნთო; მადლიანათ და ცხოვლათ დაუწყებოდა სასაფლაოც-კი. გაცრუვდა ყოველი იმედი დავლისა, თარეშობისა. დღის სასწორი ღამეა. რაღა ქნან? იმედი გაღწყდათ, სასოება დაჰკარგეს, ერთმანეთს-ღა დაუწყეს თვალიერება; ფიქრობდენ, არჩევდენ ვინ არის ჩვენში სახარჯი, შესაქმელიო. ერთი მხათ იყო მეორეს ძგერებოდა და შუაზე გაეგლიჯა.

მოხუცი ტოტია, თავ-პირ დასიებული ჯაგს უკან ეყუნთა, ფიქრებში იყო გართული; იმას ბევრი შიმშილი უნახავს და ბევრი ვაება გამტკიცდია, მაგრე რიგათ იმიტომ არ იყო შეწუხებულნი. ახლაც სხვისა იმედით ნადირობდა; ახალგაზღა მგლები უზიარებდენ იმას საზრდოს.

— ტოტიავე, ეი, არ გესმის!? რას გარინდებულხარ, ვერა ხედავ რა ამბავია? ვილუპებით შიმშილით, ღამის მგლის ნათესაობა, ჯილაგი გაწყდეს პირისაგან ქვეყნისა. რასა სწერს შენი კარბადინი, ბიძიავე? — უთხრა მას ერთმა მგელმა და თან ტოტი გაუქნია თავში.

— რას ჩადი, შე ბრიყვო, შე გაუზღელო ვირო?! თქვა წყრომით მოხუცმა მგელმა. სხვა მგლებმაც ყურები აცქვიტეს, — იგრძნეს საქმის ვითარება.

— ჰო და რა?! იღრიალა ყველამ ერთად: ძალიან კარგათ გიშვრება, შენისთანა ბრიყვზე ერთი ტოტის დაკვრა კიდევაც ცოტაა. კბილი გასვით მაგას, კბილი; ეს სინათლე სულ მაგის ბრალია! ღმუოდენ ყველანი. დიდს ხანს ალარ აცალეს და თათებს კბილებიც მიაშველეს...

-- ბიჰო, ჭკვიანათ, ჭკვიანათ! რას ჩადით, თქვე ბრიყვებო? ღმუთუნებდა ტოტია და უღრენდა კბილს ხან ერთს, ხან მეორეს, მაგრამ იმისი ღრენა ვის შეაშინებდა? ერთ წამში გათავდა ტოტიას სიცოცხლეს! ლეშთან ერთად გათავდა მისი სულიც. ბეწვიც აღარსად ეგდო იმის მრავალტანჯულის ტყავისა. ოდნავ თუ სადმე ნასისხლარს შეამჩნევდით, ის იყო. მგლებს ცოტათ გულში დაუმშვიდდათ, მაგრამ კიდევ შიოდათ. შეხედეს ერთმანეთს, შეეშინდა ერთს მეორისა, ალბათ იმიტომ ახლა მე არ შემეჭამონო. შეეშინდათ და გაფრთხენ. ერთი მეორეს გაურბოდა, ჯაგიანებში ჩხლაკა-ჩხლუკი ისმოდა და თან თოვლის ქყრიალი... მთვარე კი ამოვიდა, ამოცურდა მალა, თითქმის შუა ცაზე, ნათლად კაშკაშებდა და იქიდან, როგორც დარაჯი უფრთხოვდა ქვეყანას მტერსა... მგლები კი გარბოდნენ უგზო-უყვლოთ ტყეში და ყველას პირზე ეკერა: „განათდა. განათდა!“.

დათვი

(ამბავი)

I

ქველამ იცის, რა ცხოველიც ბძანდება დათვი: თავ-დიდი, კბილ-დიდი, კუდ-მოკლე, ბანჯღვლიანი, სვლეზია-ტვლეზია, მსუნავი, გაუმაძლარი და ქურდი. მხოლოდ ერთი აზრი აწუხებს დათვსა—რა შესვას, რა შექამოს. საკმლისთვის შორით დაიყრის სუნსა და გასწევს კიდეც. არაფერი არ გამოუვა ხელიდამ მზა-მზარეულად ქამის მეტი.

წინაპირველად, რა წამსაც-კი გამშრალს ნაძოვარზე ამოვა ჩადუნა. შუპყა, კენკეშა, ან ქინქარი, დათვმა უნდა იგემოს. სიამოვნებისაგან გაელიმება, ტუჩებს ენით გაილოკს, თავისებურად, დათვურად ღმერთს ვითომ მადლობასაც ეუბნება, რომ იმან ზაფხული მოჰგვარა და სანოვავე გაუჩინა. ხანდახან, ნამეტნავად მაშინ, როცა გამაძლარია, სიმღერასაც-კი შემოსძახებს.

ჰფიქრობს დათვი და რას ჰფიქრობს? ამა და ამ ადგილს სიმიინდი სთესიაო, ამა და ამ ად-

გილს კაი პანტა სდგასო და სხვა. ჰფიქრობს დათუნა და ამ ფიქრის დროს გოგრის ტოლა ნერწყვისა ჰყლაპავს...

რა ამაგი გაქვს ან სიმინდზე, ან პანტაზე, ან რკოზეო, რომ ჰკითხოთ, ღმერთმე მომცაო; გიპასუხებსო. სქამს და სვლევს დათვი, სვლევს და სდღღღღღს და გასუქდება ისე, რომ ზაფხულში მოკრული ქონი ზამთარშიაც-კი ჰკვებავს დათუნას, როცა იგი გულ-აღმა გდია თავის სოროში: სიარულიც-კი აღარა სჭირდება საქმლის საძებრად. ხან-და-ხან ცოტას თუ გაილოკს ხენეშა-კენესით, მაგრამ არა საჭიროების გულისთვის, არამედ სიამოვნებისთვის.

ყველაზედ მეტად კაცს გულს ის უკლავს, რომ დათვს თავისთანა დედამიწაზე აღარავინა ჰგონია: ყველაფრით შემკობილი, ყველაფრით სრული და ბედნიერი ჰგონია დათუნას თავი. დადის ამაყად, დარბაისლურად, თავ-მოწონებით. ყოფა-ქცევა აუჩქარებელი აქვს, სიკვვიანის ნიშანიცაო. ტანის მოუქნელობა და მოუხრელობა დარბაისლობის გვირგვინიაო. ცარცვა, ტაცება და ქურღობა მადლი ჰგონია. ამიტომ არ დასდევს და ჩასდებს, თუ ხელში მოიგდო ცხვარი ან ძროხა, — ჩასდებს და ზედ ხერგს მიაყრის. შეაბოტებს, გადაიმტვრევა სიმინდში, დაუწყებს ლეწვა-მტვრევას ტაროებს.

რასაც სჯამს, ხომ სჯამს, რასაც არა და ფეხითა სთელავს, ჰგორავს, თამაშობს სიმინდში.

„დათვია სიმინდშიო“, ისმის ხმა სოფელში: „გააფუქა, გაატიალა მაგ ვერანამ სიმინდებშიო“, მაგრამ ხმას-კი ვერაფერს გასცემს დათვის.

ეს იცის დათვმა, თამამად კიდევ იმიტომ იქცევა. ხშირად-კი დათვისაც ამოშხამდება ხოლმე ზუმბერაზობა: ღვთის მადლით და წყალობით სოფელში თითო-ოროლა კისერ-ჟანგიანი, სვილისფერა ბიჭი არ გამოწყდება. ეს ბიჭი თუ გაივლებს ზოლმე გულში დათვის ჯავრის ამოყრას, თორემ სხვა არაფერს. ჩამოიღებს კაჩხილამ 'შავი ბიჭი მამა-პაპურს ჩაზეირს და ჩაუჯდება სიმინდის პირში, საყურში, და აჰკიდებს სიმინდის მტერს ცხელ ტყვიას. უყურეთ მაშინ დათვის ღრიალს, იმის ბობოქრობას, ბუზლუნს, ლანძღვა-გინებას. იჯავრებს ოხერი და თითონაც თან გადაჰყვება ჯავრსა და ბორბოტს. მხოლოდ ეხლა შეინანებს დათვი ცოდვას.

დათვის მაინც ისეთი ხასიათი აქვს: მინამ მას ცხვირში არ მოჰხვდება, მანამ არ მოვა გონსა, არ იფიქრებს, ცუდი საქმე ჩამიდენიაო... დათვის არა ჰგონია, მოვკვდები, მეც მომრევი მყავსო, მანამ კვდომას არ დაიწყებს და მანამ მომრევი არ გამოუჩნდება; არა ჰგონია მეტკივნებაო, მანამ არ ატკივნებ და როცა ატკივნებ, მაშინ-კი ღრიალებს...

II

ეროთხელ, ~~ერთ დროს~~, ერთს სოფელში, გაჩნდა დათვი, გაატიალა სიმინდები, გაზიდა ხარები, ცხვარი, ძროხა. კამეჩებს იკიდებს და მიაქვსო, ამბობდნენ სოფელში. რაჩდენიმე კაციც დაბეგვა. ამ ნაირს დათვს ბაბრი ჰქვიან: ჩვეულებრივს დათვზე მეტია, ბარე სამჯერ და ოთხჯერ. ერთი რალაც მოთანთხლილი, საძაგელი არსებაა. მყრალი, გაუმადლარზე გაუმადლარი. აბა კიდევ ეს ბაბრი შეეჩვია სოფელს და აადინა მტვერი... სოფელი შეძრწუნებული იყო. გაიმართა დიდი სჯა, დიდი საუბარი, თუ როგორ ეშველა და მოევლო სოფელს თავისათვის. მიმართა სოფელმა მონადირეებს... ხალხი შეეხვეწა გიგოლას, გამოჩენილს მონადირეს... გიგოლა სამოცის წლოს კაცი იყო, მაგრამ ნაღირობას მაინც კიდევ არ იშლიდა. დათვის ოინები გაგონილი ჰქონდა და ემზადებოდა მარტო შებრძოლებოდა. ხალხი მიქუჩდა გიგოლას სახლის კარებთან.

— ოჯახის პატრონო! შესძახა ხალხმა გარედგან.

— მობძანდით, ვინა ხართ? გამოსძახა გიგოლამ.

— ჩვენა ვართ — შენი ძმები და მეზობლები. ხალხი შექუჩდა გიგოლას ქოხში. გიგოლა

კერაზე იჯდა, კალთაში ედო თავისი სიათა და სწმენდდა.

— ჰაი, შენი ქირიმე, გიგოლი, შენი, დასძახა ხალხმა თავზე: ისევ შენ თუ გვიშველი რასმე, თორემ საქმე გაქირდა; ერთი შენებური ჯეილობა კიდევ მოიგონე და რაც იქნება, იქნეს.

— რა ამბავია, სად ემზადებით. კაცნო? შეეკითხა გიგოლა.

— როგორ თუ სად? ი დათვ-ტიალამ რომ გაგვაჩანაგა, მაშ ხმა არ ამოვიღოთ, ხელი არ გავანძრიოთ?! იძახოდა ხალხი თამამად.

— ოღონდაც, ოღონდაც, სთქვა გიგოლამ; აქამდისაც უნდა გვეფიქრა რამე. სირცხვილია, სხვა რომ არაფერი იყოს. კაცო, რა გაგვიხდება მთელს სოფელს თუნდა ოცი დათვი, განალამც ერთი. მართალია, დავბერდი, მაგრამ კიდევ, როგორც იქნება, მოვაწევ, მოვათრევ მუხლებს დათვის სორომდე... იცით-კი საით მხარეზე ეგდება, სად ექნება თეგრი?

— ოჩოჩას ველის პირში რომ წყარო არის და წყაროს იქით ივლიანი გოსკლავა, სწორეთ იქა გდია ის დათვი, სთქვა ერთმა.

— რას ამბობ, ბიჭო, იქ რა უნდა, შეუტია პირველს მეორემ: იქ რა უნდა, აზირ მე მკითხო, შევილოსან, ის დათვი საცა არი? ის დათვი წორეთ, წორეთ, გიგოლი, დიდი მზვარის ბოლოს რომ ტაფობია, იქა გდია, განაგრძო მეორემ.

— ერთიცა სტყუით და მეორეც. ეს უფრო ყველაზე მართალია, სტქვა მესამემ: ის დათვი ფლატეებში უნდა ეგდოს.

-- თქვენ როგორღა ლაპარაკობთ, ხალხნო, სტქვა ქიტესამ, რომელიც მონადირე იყო, თუმცა გიგოლას-კი ბევრში ჩამორჩებოდა: თქვენი ლაპარაკიღამა სჩანს, ის დათვი ყველგან უნდა იყოს. ხალხმა ამ სიტყვაზე სიცილი ასტეხა. გიგოლა ჩუმად იყო და გულიანად უსომდა ღუმას ჩახმახს. ხმის ამოუღებლობა აღარ გამოდგებოდა, ბაასი დიდხანს გაგრძელდებოდა, ამიტომ გიგოლაც ჩაერია საუბარში.

— კაცებო, რა გაჩხუბებთ და გალაპარაკებთ ბევრს?!. სტქვა გიგოლამ. მე მომყევით, თითონ გასწავლით, დათვი სადაცა გდია... ზოგი ტაფობს ამბობთ, სხვა სოროს... იმ ტაფობში, რომელსაც სოსიკა-ბიჭი ამბობს, თავის დღეში არა წოლილა დათვი: ამ ტყეებში დავბერდი, მე იქ დათვი არ შემეხვედრია. ზაქარა იძახის ფლატეს, მითომ სოროში იწვეს?! არ მოკვდეს გიგოლა, ჯერ დათვი სოროში არ დაწვენს. რას ამბობთ, ხალხნო, ჯერ კიდევ შემოდგომაა, საკმო ბევრია, რა შეიყვანს დათვს სოროში!..

ხალხი პირ-შეუბრუნებლად ისმენდა გიგოლას სიტყვებს, როგორც გამოცდილის მონადირის რჩევას.

— სადაც შენ იტყვი, გიგოლი, იქ წავიდეთ, სთქვა ხალხმა: შენ უკეთესად იცი ნადირის სადგომი ადგილები, გასაჯალ-გამოსავალი გზები. სად უნდა ეგდოს დათვი, როგორა გგონია, გიგოლი?

— ჩემის ფიქრით, სთქვა გიგოლამ და თან ჩაახველა, ფიჩხიანში უნდა ეგდოს.

— ეჰე, როგორ გაიგო, კაცო, მკითხავი ხოც არა ხარ!? სთქვა სიცილით თევდორამ და თან მარჯვენა ხელით ისწორებდა თავზე განახევრებულს ტყავის ქუღს. ეს ქუდი თევდორას მარტო კინკრიხოს უმაღლავდა და კეფის მხრივ მშიერი მგელივით პირი დაეღო. ამ თევდორას ნატყვევარს ეძახდნენ, რადგან ოცი წელი ლეკების ტყვე იყო. თევდორა მოხნიანებული კაცი იყო, მაგრამ ლურჯ თვალებს ცეცხლივით ანათებდა და მთელის საათის განმავლობაში ერთხელ არ დაახამხამებდა. სოფელში სამს ნაბაღზე მარტო თევდორა ხტებოდა.

— გიგოლა მართალს ამბობს, განაგრძო თევდორამ: ჩვენებიანთ გოგო-ბიჭებს გუშინ-წინ ფიჩხიანში ენახათ დათვი, ზღმარტლზე ყოფილიყვნენ. ფიჩხიანიდამ წამოვიდაო, სთქვეს, მოაბარტყუნებდა, ტყე და ველი ფეხით მოჰქონდა, მოდიოდა და თანაც მოხვნეშოდა, მოკვნესოდაო. შეშინებულებს კალათები გადაესროლათ და, აბა ვინ წინა და ვინ უკან, დედიშობილები მოცვიდნენ სოფელში თავპირ-გადამტვრეულები და გადაკაწრულები: ვის.

ცხვირი ჰქონდა გატეხილი, ვის თვალი გამოთხრილი, ვის ფეხი ნალრძობი, ვის ხელი მოტეხილი, ვის ყური გახეული. გოგრაქამიანთ ბებერი ნახევარ კაბის ნაგლეჯს ხელით მოათრევდა და ისე ვამარდებულებოდა, რომ ყველაზე წინ ის შოვარდა სოფელში.

— დღეს გვიანლა არისო, სთქვა გიგოლამ: ხვალ დილისთვის ყველანი უნდა მოემზადნეთ, ვისაც წამოსვლა გწადიანთ. მანამ გათენდება, სოფელს უნდა გავსცდეთ, არაეინ დაგვინახოს. ნადირობის წესი, თუ გინდა გაიმარჯო, ეს არის.

— როგორც შენ იტყვი, გენაცვალე, გიგოლი, ისე მოვიქცეთ, — სთქვა ხალხმა.

— სწორეთ ვგრეო, სთქვა გიგოლამ: ცისკარი რომ ამოვა, ჩემთან მოიყარეთ თავი თავს, აქედამ მე გაგიძღვებით, ვახსენოთ ღმერთი და წავიდეთ. ამდენის სირცხვილის ჰამას, ბარემ ყველანი დავექვივნეთ, აღარ დაგვძრახავენ მაინც.

ხალხმა პირობა შეკრა დილისათვის და დაიშალნენ ყველანი, თავ-თავის სახლებში წავიდ-წავიპოვიდნენ. ყველამ იარაღს დაუწყუო მზადება: ერთი ცალ-ცალკე მოფანტულს ლულას, კონდახს, ჩახმახსა ჰკრეფდა და სემდა კონდახში. მეორეს თოფის ფეხი მოჰშლოდა, ხის ფეხს უკეთებდა. მესამე ლაჩა-ყბებზე კანაფს ახვევდა, ჩახმახს და ტალს ისე ამაგრებდა, რადგან ბულლი დაეკარგნა; მეო-

თხე ქუდს აგდებინებდა სამის წლის გატენილს
თოფს და ნაცრად ქცეულს წამალს აყრევინებდა
ლექლიდამ. მეხუთეს ტალიაკლდა და ტალის სათ-
ხიხენელად დარბოდა მეზობლებში, მეექვსეს ყვე-
ლა ფრით გამართული თოფი ჰქონდა და ტყვია-
წამალი-ლა აკლდა; მეშვიდეს სულ დარამად, ყვე-
ლა ფრით მოშლილი თოფი ჰქონდა, ველარაფერი
გაეწყრა და ცოლსა ჰლანძღავდა და ჰქოლავდა,
ცოლს, რომელიც უშლიდა ქმარს სანადიროთ წა-
სვლელად და ეუბნებოდა, ჯერ ჩიტი არ მოგიკლავს,
შენ ტყეში ნადირს როგორ მოჰკლავო, რატომ
შენს კერაში არა ზიხარო. მერვეს თოფი არა
ჰქონდა და დამბაჩასა ჰმართავდა. მეცხრეს არც
დამბაჩა ჰქონდა, არც თოფი და ამიტომ ნაჯახსა
ლესავდა. მეათეს ნაჯახი არა ჰქონდა, ქერში შე-
ტანებული მამა-პაპის ნაქონი შუბი მოეგდო,
იმასა სწვერავდა, ჰფერავდა და აფხავდებდა პირ-
ოფლიანი. მეთერთმეტე დაჰფუძნებიყო წალღუნას,
მაგრა მოეჭიდა მარჯვენა ხელი ტარზე და მარც-
ხენით ფხას უსინჯავდა. მეთორმეტეს, მეცამეტეს,
მეთოთხმეტეს, მეთხუთმეტეს და სხვა და სხვას არ
მოეპოვებოდათ მახვილი, ფრჩხილის საკვეთი,
როგორც ხალხი იტყვის; ამათ ნათხოვარის იარა-
ღით გამთქვარად კეტები და ერთმანეთს ამ ლექ-
სით ახსენებდნენ:—

ვინც რომ ვაჟია,
ჩოხა—ჯაქვია,
ქუდი ნაბღისა—
ჩაბალახია.

გიგოლა მხნედ, იმედინად იყო. რა ამედიანებს გიგოლას? ის, რომ წუხელის კაი სიზმარი ნახა, კაი სიზმარი, ე. ი. დაცდილი სიზმარი. როცა ამ სიზმარსა ჰნახავდა, ცარიელი არა დროს არ დარჩენილა. სიზმარი არც არავის უამბო, რადგან დარწმუნებულია, —სიზმრის ბეზღება, სხვისთვის, სხვისთვის შეტყობინება კარგი არ არისო. რა სიზმარია ის სიზმარი, გიგოლას რომ კარგათ დაუცდია და წუხელი ნახა. გიგოლამ ნახა, რომ გაშლილს სუფრაზე იჯდა, ქეიფი იყო: სჩეულობა და კმეულობა. გიგოლას ქალმა ჯიხვით ღვინო მიაწოდა სიზმარში და აჰანაც გადაჰკრა; ხორცი მოუტანეს, ხორცი ლურთი იყო, მქისე სუნი მოსდიოდა და ის კი არა კამა. ეს ამის ნიშანია, რომ გიგოლა მოჰკლავს უწმინდურს ნადირს. გიგოლას ისე იმედი ჰქონდა, რომ ვითომ ხელში სჭერია, წინა სდებია მოკლული ნადირი...

III

დაღამდა ის ღღე. სოფელს მიეძინა, ყველაფერი მიყუჩდა. მხოლოდ ძაღლები-ღა წკავ-წკავებენ, ათასში ერთგნით მომჩინარი ქოხებიღამ

ცეცხლის სინათლე თანდათან მიწელდა და შემდეგ გაჰქრა სრულიად. მიწვა-მოწვა ხალხი. კატებს მიეცათ ეხლა ნება ცეცხლთან, კერასთან მისვლის... თვალ-დახუჭულებს მიეპყროთ სითბოსთვის გულები, მაგრამ ყველას არა: მსუნაგი კატები რაც იყვნენ, ისინი თაროებს აქოთებდნენ. ამის გამო თუ გაისმოდა ხმა ქოხიდამ: „აცხა“, „აცხაო“!

მამალმა სამჯერ იყივლა, აღმოსავლეთით აღმოხდა ცისკარი და გაუცინა სოფელს. ყველანი, ვინც დათვზე ემზადებოდნენ, ფეხზე დადგნენ. უფლიდნენ ერთმანეთს კარი-კარს და ეძახდნენ: „გაიღვიძეთ, ადექით, ბაჰო დროა დათვზე წავიდეთ“!

გიგოლას იმ ღამეს ტანთ არც-კი გაუხდია, მხარ-თეძოზე შემოწოლილს დაეძინა; კერის პირას... ხალხმა მოიყარა თავი-თავს და მიქუჩდნენ გიგოლას ქოხის კარებთან.

გიგოლამ ხალხის ხმაურობა მალე გაიგონა: ადგა, იარაღები აიხსა. სასწრაფო, საპირისწამლე ყველაფერი მზად ჰქონდა გიგოლას, რაც-კი ნადირობისათვის იყო საჭირო; იმას არც არავისთვის ტალი უთხოვნია, არც წამალი. ახალგაზღურად გამოვიდა ქოხიდამ გიგოლა და მოხდენილად გადიგდო თოფი მხარზედ. ნამეტნავად უხდებოდა წელზე ძველებური, წვერ-შემოკაუქებული ხანჯალი,

— აბა, ბიჭებო, წავიდეთ. მე მზათა ვარ! სთქვა გიგოლამ დაბალის ხმით, მაგრამ მხნედ და გაბედულად.

ყველანი მიჰყვნენ უკან. ოც-და-ათამდე კაცი წავიდა დათვზე, ნახევარი გზა თითქმის გაიარეს... ყველაზე მეტად ეს ღუმილი თევდორას აწუხებდა, იმ თევდორას, რომელიც მთელის საათის განმავლობაში ერთხელ არ დაახამხამებდა თვალებს და განახევრებული ქუდი ეხურა კინკრიხოზე.

— რა მუცელში ენა ჩაგივარდათ, ხალხნო, რატომ არაფერს იტყვიან! სთქვა თევდორამ სიცილით: იქნება ყველანი გაგვპენტოს, შვილო, იმ დათვმა. ვსთქვათ მაინც რამე, ან გავიციანოთ, ეს მაიც შეგვრჩება... ხომ ერთი-ორი არ გადაუვრჩებით დაუბეგვავი და როგორ უნდა გავიგოთ, ვის დაბეგვავს დათვი და ვინ გადარჩება... ძან მინდა, ვიცოდე, ჩემმა მზემ. მოდი ერთი, ქიტესო, წილი ვყაროთ მე და შენში ვის დაგვბეგვავს დათვი და ვინ მშვიდობით გადავრჩებით, — უთხრა სიცილით თევდორამ ქიტესას.

— ძან კარგი იქნება, უპასუხა ქიტესამ: აბა რაზე ვყაროთ?

— აი ნაჯახის ტარი. თევდორას ნაჯახი ჰქონდა გარქობილი წელში, გამოიძროდა მოჰკიდა ტარს ძირში ხელი: ვინც ზევით არ მოვა, დათვი იმას დაბეგვსო. ქიტესამ თევდორას ზევით

მოჰკიდა ნაჯახის ტარს ხელი, ახლა ისევ თვე-
დორამ, მერე ქიტესამ. გათავდა ნაჯახის ტარი,
ქიტესა მოხვდა ზევით.

— გერგო, გერგო ქიტესო! დაიწყო თვე-
დორემ სიცილი: რაკი დაგბეგვავს, მადლიანად
მაინც დაგბეგვავს ნეტავი, მე-კი სეირს ვუყურო.

— რა იცი, რომ შენ არ დაგბეგვს დათვი?!
მიუბრუნდა თვედორას სოსიკა-ბიჭი.

— მე რათა, შვილოსან, განაგრძო ღიმი-
ლით თვედორამ; წილი თუ კი არ მერგო, რათ
უნდა დამბეგვოს!?

— წილს რა ჰკუა აქვს, უპასუხეს თვედო-
რას სხვებმა ხუმრობით: იქნება შენ დაგბეგვავს
და ჩაგდოს კიდევ?

— ეჰ, მე ვიცი ცოლ-შვილი ამიტირდება!
დამბეგვოს და დამბეგვოს, რა იქნება, განაგრძო
თვედორამ მამაცად. ლეკებმა მბეგვეს, ჯერ იმათ
ვერ დამბეგვეს, ისევ ის თვედორა ვარ, დათვმა
როგორ უნდა დამბეგვოს!? თუ ღონით ვერაფერს
გავაწყობ, გაქცევა ხომ ჩემი ხელობაა. ბრალი
თქვენი, შვილოსან, რომ ღონეს დათვს ვერცა
ვინ შეუწონთ და გაქცევითაც ვერ გაექცევით.

— მართლაც, კაცო, სთქვა. ერთმა: მივდი-
ვართ დათვზე და აღარა ვფიქრობთ იმას, რომ
დაგბეგვავს ყველანი და ცოლ-შვილის ცოდვა
დავიდლოთ კისერზე. რა გვინდა? უნდა თავი და-

გვენებებინა, ერთხელაც იქნება ხომ გადიკარგება სადმე, მოსწყინდება აქ ყოფნა.

— შენ ვიჟი ხომ არა ხარ, რას ამბობ კაცო?! სთქვა მეორემ. მაშ უნდა შევარჩინო დათვის ჩემი კვებულა?! მოვკვდე, მაშინ მოვკვდე!

— შენ ეგა თქვი, სთქვა მესამემ: ჩემი ნიკორა კამეჩი-ლა?! ვაი დედას მტრისასა!—და ჩაიმჯილა გული.—ქრისტეს ზადღმა, მთისათვის რომ მოგება, მთას მოჰკლევდა. მაშ უნდა შერჩეს დათვის იმისი შექმა?! თუ ხელით ვერაფერს ვაწყო, კბილით მივვარდები. ვოჰმე, ვოჰმე, ჩემო ნიკორა კამეჩო!

— ყველანი თავის ჭირსა სტირით, შეილო, და ჩემს გულში კი არ ჩამოიხედავთ... საახალწლოთ ვინახამდი კერატს და მაგ ვერანამ არ მომტაცა! მიჰყვანდა და თან მიაჰყვირებდა... არა, არა, დათმობა არ იქნება. გული ვერა სთმობს, სთქვა მეოთხემ.

— თქვენ ჩემი სთქოთ, კაცო! სთქვა მეხუთემ: საქონელი რა სათქმელია... ნეტა ჩემი კოლისათვის გული არ გადმოვგდებინა ბუდიდამ. მას შეგმდეგ, რაც ეს ვერანა ენახა ზღმარტლზე ყოფნის დროს, ძილში ბოდაეს და ორჯელ ქადაგადაც დაეცა.

— მე არც ძროხა მყავს, არც ცხვარი, არც ლორი, არც კამეჩი, კატაც არა მყავს სახლში,

თქვენც კარგათ იცით, ცოლ-შვილს ვინ იტყვის, სთქვა თევდორამ; არც არაფერი შეუქამია ჩემი დათვის, მაგრამ სოფლის გულისთვის ჯანდაბას იყოს ჩემი თავი, ერთ დღეს გავჩენილვარ, ერთს დღეს მოვკვდები. ჩემ ფეხებს! ყოჩაღათ იყავით, ნიახურელებო, ყოჩაღად! თანაც ისეთი შეუქყვივლა თევდორამ, რომ ყველანი შეხტნენ, თითქოს ქორწილში არის თევდორა და არა ტყეში სანადიროდამო.

გიგოლა სულ წინ მიდიოდა და დინჯად მი-აბოტებდა, ლაპარაკში არცკი ერეოდა. თევდორას შექყვივლებაზე გიგოლამ მოიხედა და შეუბღვირა თევდორას. თევდორასაც თითონაც ცოტა არ იყო შერცხვა, პირზე ხელი მიიფარა, და დაქყეტილი თვალები უფრო დააქყიტა. თევდორას არც სხვებმა მოუწონეს ეს ულაგოდ შექყვივლება.

— აქკი ნუ ღრიალებ, თუ ბიჭი ხარ, მამაცად დათვის დაუყვირე, უთხრა თევდორას ჭიტესამ, რომელიც ცოტა არ იყოს გულნატკენი იყო იმითი, რომ წილმა დათვისაგან დაბეგვა ამას არგუნა.

— მოკვდეს თევდორა, თუ დათვის უფრო არ დაუქყვირო, სთქვა თევდორამ და თან თეთრის ჩოხის წამოწეწილი—ჩამოგლეჯილი კალთები აიკეცა და ჩაიმაგრა ქამარში. თევდორას ისეთი ჩამოგლეჯილ-კალთებიანი ჩოხა ეცვა, რომ გეგო-

ნებოდათ, როცა შეჰხედავდით იმის ჩოხას, თას-
მები ჰკრდიოა... ჩაიმაგრა, შემოიკალთა ჩოხა
თვედორამ და გაირქო ისევ წელში თავისი ნაჯა-
ხი. ნაჯახის პირზე ერთს მქადსაც დაედვა ყური
და ამაყად ამოიციქირებოდა ჩოხის კალთიღვან.

IV

მონადირეები ეხლა ტყეში იყვნენ. გარიჟ-
რაჟელა და ერთს ხევს მიაღვნენ, პირები დაიბანეს,
ზოგმა ჩიბუხი გააჩაღა, სხვამ პურს დაუწყუო ლოდ-
ნა. დაიბანეს პირები და გადიწერეს პირჯვარი.
ხევს რომ გასცდნენ, აღმართს შეუღვნენ. ტყესა
და ტყეს შუა ველები იყო, ველები მწვანედ მო-
სჩანდა, ბოლით დაფარული. უცბად ყველანი შე-
ჩერდნენ. თოფიანებმა თოფებს ხელი გაიკრეს.
რა მოხდა? ტყილამ გამოცანცაღდა კურდღელი,
ჯერ კიდევ ნამი არ გაჰშრობოდა ტანზე და ყუ-
რებზე. პატარა-ხანს გზაში შედგა, დაყუნტდა, ყუ-
რები აცქვიტა. წინად დაბუხულს ჰგავდა და
ხალხი რომ დაინახა, ფიცხად გადახტა და მიიმა-
ლა ტყეში. თოფის სროლა ვერაფერს მოასწრო.
გიგოლამ უურადღებაც არ ათხოვა და სხვებსაც
დაუწყუო ჯავრობა.

— სად არის იმდენი ტყვია-წამალი, კურდ-
ღლებზე ვხარჯოთ. კურდღელს რომ ტყვია მოხვ-
დეს, ხომ ფეხების მეტი აღარაფერი დარჩა.

— აი დასწყევლოს ღმერთმა, იძახოდა ხალ-

ხი: როგორ დაგვნავსა მაგ ვერანამ! ცუდი ნიშანია, ცუდი!

ცოტა რომ გაიარეს, უფრო ფიცხად გაიკრეს თოფიანებმა ხელი თოფებზე, ნაჯახიანებმა აჯახზე, წალღუნიანებმა წალღუნაზე და შუბიანებმა შუბზე. რადა? რა მოხდა? რა ამბავია? ის ამბავია, რომ საით მხარესაცა კურდღელი გადახტა, იმ მხარიდამ, თუმცა ცოტა ზემოდამ, მელა გადმოხტა და სწორეთ ერთი ადლის ტოლა კუდი გადაათრია გზაზე.

— მელა, მელა, მელა! დაიძახა ხალხმა ჩურჩულის ხმით. მელამ ერთი თავისებურად, ცბიერად, ცბიერის თვალებით გადმოხედა მონადირეებს, ულვაშები, თან ტუჩი აიფშრუკა, თითქოს დასცინა მონადირეებს, გადახტა თავ-მომწონებით და დასკუპდა ველის პირად.

— უყურე მაგ ვერანას, სთქვა ერთმა და თან თოფი მიუღერა, დააჩხლაკუნა და არ გაუვარდა-კი. მელამ კუდი აიბზიკა, გადახტა და იქვე დაცუცქდა.

— ჰაი, შენ საოხროვ, შენა, სთქვა მეორემ და მიუშვირა თოფი: მე გიჩვენებ შენ სეირს. დაუჩხლაკუნა და კიდევ იმასაც არ გაუვარდა. მელამ წინანდებურად კუდი შეიკაუჭა, გადახტა, შემოიხედა ერთი და იქვე დაყუნტდა... დასცინა მონადირეებს, ნამღვილად დასცინა. მონადირენი

განცვიფრებით ბრაზ-მორეულნი შესცქეროდნენ მელას...

— დაგნავსათ, რა ამბავია, მაგ ოხერმა? სთქვა მესამემ და მიუჩხლაკუნა იმანაც თოფი. ფალიამ აიარა, მაგრამ თოფი კიდევ არ გავარდა მელამ ვხლა-კი იკადრა და გადახტა ტყეში. ამ სურათის მნახველს თევდორას სიცილი ველარ დაემაგრებინა, მუცელი ხელით ეჭირა და ჰგორავდა დაბლა.

— ვაჰმე, დედავ, ვაჰმე, დედა ჩემო! ნეტა ი საოხრო მუგუზალი მაინც წამომელო, კასკასებდა თევდორა.

გიგოლას ძალიან ეწყინა ეს ამბავი და შეუტია მონადირეებს.

— მაგ იმედით მოსდიხართ დათვზე?! ვაჰ, შენ ჩემო თავო, ვაჰ, შენ ჩემო თავო! სთქვა გიგოლამ გაჯავრებულმა: მომიტანეთ აქ თოფები, მომიტათ ჩქარა!

— შენ რატომ არ ესროლე, გიგოლი, თოფი იმ ოხერს. რა გვიყო, როგორ დაგვნავსა, ვერ უყურებ?— უთხრეს მონადირეებმა გიგოლას.

— სადათვედ გატენილი თოფი მაქვს, მელაზე დავცალო?! სთქვა გიგოლამ; მომიტანეთ აქ თოფები!

გიგოლას თოფები მიუტანეს: სათითაოდ ყველა თოფები გაშინჯა... ყველას ტალეები გამოა-

რიდა, დაუპირა, ყველა საფულია თოფებს თავის საპირის-წამლიდამ დაუყარა თოფის ყურზე.

— ვაი, ვაი, რა ხალხნი ხართ, ამობოზდა გაჯავრებული გიგოლა: თქვენი რა იმედი უნდა ჰქონდეს კაცსა! დათვზე მოდიხართ და რა იარაღით მოდიხართ, სირცხვილი არ არის?! განა ნადირობა რომ გაგიგონიათ, მაგ ნაირის იარაღით ნადირობენ და ჰხოცენ ნადირსა?!

— ყოჩაღათა ვართ, ფიქრიც არ არის, გიგოლი, სთქვა თევდორამ სიცილით: ერთი მუგუზალი-ლა გვაკლია, სხვა არაფერი!

— შენ რომ თოფიც არა გაქვს, შვილო, შენ ვისლა დასცინი! უთხრეს შერცხვენილმა მონადირეებმა, სიცილისაგან თვალეზ-მოცრემლიანებულს თევდორას.

V

ხალხი, ცოტა არ იყოს, სასო-წარკვეთილებაში ჩაეარდა ამ მარცხის გამო, იმედი შეუსუსტდა გულში, მაგრამ მაინც წინ მიდიოდა, უკან დახევა აღარ შეიძლებოდა. მონადირეებმა გადავლეს ქედი და მოედნენ ხშირს, დაბურულს ტყეს. ბევრი იარეს, ცოტა იარეს. გავიდნენ მლაშე ველში. ჯერ მზე კიდევ არ ამოსულიყო, მხოლოდ გაეწითლებინა-კი აღმოსავლეთი. ფრინველთ პირველ განთიადის გაჩაღებულს გალობას უკლეს, მხოლოდ წიპრია და წიფლის-ჩიტა არ დაღალული-

ყვენ. მონადირენი დასხდნენ ცოტა ხანს და გამართეს თათბირი იმაზედ, თუ საით და როგორ მისვლოდნენ დათვისა, რადგან დათვის ბინაზე, მის საწოლზე ახლო იყვნენ.

— იცით, ბიჭებო, ჩვენ რა უნდა ვქნათ და როგორ უნდა მოვიქცეთ? სთქვა გიგოლამ, მაგრამ სიტყვის დასრულება ველარ მიასწრო, რომ ფიჩხიანიდამ ბლუილი შეძოვსმათ... ოჰო, ოე, სთქვა კვლავ გიგოლამ გამხიარებულმა: მე რომ გითხარით ფიჩხიანში ეგდება-მეთქი, აბა დაიყურეთ, რა ამბავში არის ჩვენი მტერ-მოყვარე!

ყველანი ფეხზედ წაწოდგნენ, აცქვიტეს ყურები და გაიციქირობოდნენ ფიჩხიანისაკენ.

— ეჭვ სთქვა ერთმა; როგორა ბურტყუნებს ეგ მუდრეგი!

— ჰაი და-და-და-და-და, სთქვა მეორემ: ძაან არ გამწარებულა!

— ჰაი, ოხრობა შენი და ტიალობა! გაისმა ზაერთო ხმა ხალხისა: რა აღმულებს, გიგოლი, მაგ მუდრეგს?

— კბილი ასტკივნია, მიუგო გიგოლამ და თან ჩიბუხზედ ჩიბუხის ნემსით აბედს დაუწყოსწორება: — დაიცადე, დაიცადე პატარა ხანი, მაგ სხვა კბილებს ჩვენ აგატკიებთ, მოგვითმინე პატარა ხანი, — კიდევა სთქვა გიგოლამ თავ-მომწონედ.

— კბილიო? განიმეორა ხალხმა: ესემც ასტკიენია, რომ თან გაეტანოს კიდეც. ჩვენი ცოდო რა ხეირს დააყრის!

— კბილი-კა არა, სთქვა ღიმილით თვედორამ, გვემუქრება; გაიგო, რომ მივდივართ და გვეძახის: „აბა კაი ბიჭები იქნებით და მოხვალთო!“ გიგოლა გეხუმრებათ, რა არის გული არ გაგიტყდეთ.

— არა, მართლა კბილი სტკივა, გეთაყვა-გიგოლი?! განმეორებით შეეკითხა ხალხი გიგოლას.

— მართლა, მამი-ჩემის სულის განათლებამ სხვა დათვის არაფერი დააწყებინებს ეგრე გაბმით ღმუილს. ერთი როცა თოფს დაჰკრავ, მაშინ დაიღრიალებს მხოლოდ ერთხელ, მერე ხმას ვაიკმენდს, თუნდა დაქრილიც იწვეს, ან მირბოდეს, აღარა ღრიალებს. ეხლა ეგ ადგილობრივა გდია და უფრო საშიში ეხლა არის; უეჭველად ომს აგვიტებს, მაგრამ, ღვთით, ვერაფერს-კი გამოგვრჩება. თქვენ, როგორც მე დაგარიგოთ, ისე მოიქეცით.

— რაკი კბილი ასტკიენია, იქნება კიდეც გადიტანოს თან. მოდით თავი დავანებოთ, სთქვა ერთმა და ნახევარი ხალხი ამ სიტყვაზე დათანხმდა.

— აი ყოჩაღ! მართლა, მართლა, კარგი მოიგონეს, სთქვა გიგოლამ სიცილით.

ამდენის ხნის გაუცინარს ეხლა ძლივს გაეცინა გიგოლას.

— ბაღლები ხომ არა ხართ, რას ამბობთ, კაცნო? განაგრძო გიგოლამ: თუ გეშინიათ და სული ძალიან გეტკბილებათ, ნუ წამოხვალთ, მიბრუნდით უკანვე და მიუდით თავის ცოლებს შინ მშვიდობით, თუ არა და, რას ამბობთ, როგორ ამბობთ? დედა. კაცები ხომ არა ხართ, კაცები ხართ, თავზე ქუდები გხურავთ. ქუდი კაცს ნამუსისათვის ხურავს, განა მარტო სიცხე-სიცივისათვის. სირცხვილით მაგას როგორ ამბობთ, თუნდა იცოდეთ კიდევ, რომ ცოცხლები ვეღარ დაბრუნდებით შინა?.

— ვხუმრობთ, გიგოლი, განა მართლა ხომ არ ვამბობთ, შესძახა გამხნევებულმა ხალხმა: რასაც შენ გვეტყვი და გვირჩევ, ჩვენც ისე მოვიქცევით.

— ე მაგრე, ჰაი, ყოჩაღ, ნიახურელებო, ყოჩაღ! შესძახა თევდორამ თავისებურად და ჩამოიწია თავისი დაგლეჯილი ქუდი თვალეზედ..

ყველანი გაუჯავრდნენ ამ მოუთმენლობისათვის. თევდორამ იტურნა და თავისათვის მიჯდა გამხმარის ჯროყრების პიში.

— პირდა-პირ უნდა სოროში მივუხტეთ, იძახდა ხალხი. ყველანი ერთბაშათ უნდა მივიდეთ და დავუშინოთ თოფები!

— არა, სთქვა გიგოლამ, ერთის მხრიდამ მისვლა არ გამოდგება. როგორ იქნება? წამოხტება და სხვა მხარეს გავექცევა, პირში ჩაღას გამოგვაღებს. ეგრე-კი არა, ჩემო ძმებო, ჩვენ უნდა გარს შემოვერტყნეთ დათვის ლოვინს, ირგვლივ რამდენიმე კაცი ერთად დადგეს, ოროლი ან სამ-სამი, რომ ერთმანეთს მიეშველნენ. ერთი-ორი ბიჭი ზევით უნდა გავგზავნოთ, რომ დააგორონ ქვები და ზედაც თოფები დაახლონ. დათვი ადგება, პირ-აღმა არ გაიწევს, წამოვა თავ-ქვე და ჩვენც წინ დავუხვდებით.

ხალხი ძალა-უნებურად დასთანხმდა გიგოლას რჩევას; ყველას ერთად ყოფნა ეწადა, ერთად პრძოლა და ერთს ადგილს სიკვდილი, მაგრამ არ შეიძლებოდა, ხალხი დასთანხმდა გიგოლას. ორი ბიჭი დათვის ასაგდებად გაგზავნეს და ხალხი ორორ-სამ-სამი კაცი ერთად დადგნენ თიჩხიანის გარეშემო. დათვის ბლავილი და კვნესა ისევ ისე მოისმოდა. ზოგნი ხერგებში შეძვრნენ, სხვანი ბუერიანში ჩაიმაღნენ, ან ხეებზე ავიდნენ და ამბობდნენ: ზევიდან უფრო კარგათ დავაზელთ დათვს თოფსაო. ქიტესამა და თევდორამ ერთი ძირიანათ ამობრუნებული წითელი აისაფრეს. ქიტესა დაიმალა ფესვებთან, თევდორა წითლის წვერებთან მაღალ ფეხზე შემოყენებულის ქოთაჩით.

— ნუ გეშინიან ძმაო ქიტესო, ჩამოსდუ-
ღუნებდა ზევიდგან თევდორა: თუ ჩემი ნაჯახი აქ
მექნება, ლომსაც გავისტუმრებ, განალამც დათვს.
ამბობდა რა ამას თევდორა, თან ნაჯახს ატრია-
ლებდა ხელში.

თევდორას ზემოთ თელასთან ატუზულიყო
სოსიკა-ბიჭი, იმასაც მოემზადებინა გაშავებული
და ჟანგისაგან შექმული ხარა თოფი. გიგოლა
ქვევით გეზზე ჩაუჯდა. ერთი ცეცხლისაგან გამო-
მწვარი და გატუსული ყუნჭი აიფარა, თოფს წვე-
რი დათვის მოსაველისაკენ მიღბრუნა და გაფაცი-
ცებით, მოუთმენლად ელოდა დათვის გამოჩე-
ნას. ყველანი, თავ-თავიანთ იარაღით მომზადე-
ბულნი, გულის ფანქვალით ელოდნენ დათვთან
ომს.

VI

მოისმა კივილი დათვის ასაგდებათ გაგზავნი-
ლის კაცებისა და გავარდა ორი თოფი ზედი-ზედ.
დათვს ამ ხმაურობაზე ცუდმა მხარმა უთხრა. აღგა
გამწყრალი, ახალმა ქირმა კბილის ტკივილი და-
ავიწყა. სიბრაზისაგან პირზე დორბლი მოუვიდა.
წამოვიდა თავ-ქვე ბუზლუნით. მოდიოდა დათვი
ზვავივით, მოჰქონდა ფეხით მიწა და ფოთილი
და ტანით შიმეღების ტოტები. ყველას ჟრჟო-
ლა მოჰკიდა ტანში, მოუვიდათ ჟამი ციებ-ცხე-
ლებისა. დათვი ექვსს მონადირეს გაშოსცდა. ამ

ექვსში მარტო სამი იყო თოფიანი, სხვანი კეტე-
ბითა და შუბებით იყვნენ: თოფიანებმა დათვი
რომ გაიცილეს, მერე დაახალეს თოფები. სამი
თოფი ერთბაშად გავარდა, დათვი დაიჭრა რამ-
დენსამე ადგილას და მორთო ღრიალი. ნატყვივ-
რებს კბილით იჯენჯდა და ამტვრევდა ხეებს,
ასტეხა ვაი-უშველებელი, დიდი მუქარა, დიდი
ამბავი და გაექანა ბურტყუნით იქითკენ, სადაც
ქიტესა და თევდორა იყვნენ ჩასაფრებულნი... ქი-
ტესამ დათვს თოფი შუბლში დაუმინა, დასხლი-
ტა ჩახმახი, თოფი გავარდა, ტყვია ძირს დაუცდა,
ფეხში მოხვდა დათვს და წინა ტოტი მოსტეხა.
დათვი გამწარებული გაექანა, დაეტაკა ქიტესას
და დაუწყო ბეგვა...

„კაცი მოკლა, კაცი მოკლა!“ გაისმა ხმა
მონადირეებისა: „უშველეთ, კაცებო უშველეთ!“

— ნუ გეშინიან, ძმაო ქიტესო, მე აქა ვარ,
ნუ გეშინიანთ, გაისმა ხმა თევდორასი. თევდორა
ნაჯახ-მოღერებული გადმოხტა და მიიწია მისა-
შველებლად. გაგონილი ჰქონდა, რომ დათვზე
რომ გადაჯდეს კაცი და ყურები დაუჭიროს, და-
თვი ველარაფერს უზამსო. თევდორაც მივიდა თუ
არა, შეახტა დათვს ზურგზე, ნაჯახი ხელიდამ ჩაუ-
ვარდა, როცა ყურების დასაქერად დათვს ჩააწვა-
და ხელები. დათვი შედგა ტოტებზე, აასქდა და
დაასქდა. თევდორა მოიგდებინა, ამოიღო ქვეშ

ქიტესასთან ერთად და დაუწყო ორივეს ბუბენა-გამოექანა სოსიკა-ბიჭი, მორბოდა მოსაშველებლად და თან გამოწვდილი დამზადებული თოფი ეჭირა ხელში. უცბად ხელი მოჰკრა ვილამაც უკან კალთაზე, „ვაიმეო!“ დაიძახა სოსიკა-ბიჭმა და დაეშვა დაბლა, თოფიც ხელიდამ ჩაუვარდა. იმას ეგონა დათვმა დამიჭირაო.

— ნუ გეშინიან, შვილო, ნუ გეშინიან, მე ვარ, ეუბნებოდა ათრთოლებულის ხმით გიგოლა, რომელიც დათვს ეპარებოდა და უნდოდა თოფი ესროლა დათვისათვის. გიგოლას შეეშინდა, ვაი თუ სოსიკა-ბიჭს დაუცდეს თოფი, ხელი აუკანკალდეს და კაცები დახოცოსო დათვის მაგიერად. ამიტომ დაუჭირა კალთა სოსიკა-ბიჭს და დაახვეინა უკან. სოსიკა-ბიჭს გული წაუვიდა და გამტკნარებული გაიშლართა დაბლა, მაგრამ გიგოლამ იმას ყური აღარ უგდო. დაუჩოქა დათვს და ყურის ძირში მისცა თოფის ნიშანი. დათვი ამ დროს თევდორას ჰბეგვდა. თოფმა დაიგრიალა, ცოტახანს ისე იყო, ყურის ძირში ტოტი მოისვა და დაჰხედა. რა ნახა სისხლი, დაიდრიალა ერთი-კი საცოდავად, გადაგორდა და თევდორაც თან გადიყოლა, რადგან თევდორას მკლავი პირში ეჭირა. მონადირეებმა დაინახეს რა წაქცეული და დაგორებული დათვი, გამოვიდნენ საფრებიდამ. ზოგნი გამოსულებიც იყვნენ და მი-

საშველებლად მობოძნენ. შეჰქმნეს ყვირილი, დასცეს კიჳინა. მისცინდნენ გიგოლას და დაუწყეს კოცნა.

VII.

— ემ თვალში გენაცვალე: გიგოლი, რომ სჭუტავ ხოლმეო, ჰკოცნიდა ერთი მარცხენა თვალში.

— მარჯვენა თვალში გენაცვალეო, ეუბნებოდა მეორე და ჰკოცნიდა: რომ კარგად ამოიღებ ხოლმე ნიშანში.

ზოგი ეხვეოდა დაქრილებს და უხვევდა წყლულებს. თვედორა ქიტესაზე მეტად იყო დაბეგვილი, ცალი ხელი, თეძო მილენილი ჰქონდა, თვალ-პირზე სისხლი ჩამოსდიოდა, მაგრამ ერთხელაც არ დაუკვნესია. ქიტესას გვერდი ჰქონდა გამოგლეჯილი და ცალი ლოყა დაკაწრული. სოსიკა-ბიქსაც სინჯვა დაუწყეს, მაგრამ წყლული არსად არა სჭირდა, თუმცა-კი თვალები დახუჭული ჰქონდა და მკვდარივით ეგდო. ჩაუყვეს უბეში ხელი, გული ჟუცემდა.

ე რა ამბავია, კაცო? ეკითხებოდნენ ერთმანეთს: კაცი ცოცხალია და მკვდარს-კი ჰგავს?!

— შეეშინდა, არაფერი უშავს! შემოსძახა ხალხს გიგოლამ. ხალხს მიჰქონდა წყალი, ზოგს

კალთით, სხვას ქუდებით, ბუერით და ასხამდნენ სოსიკა-ბიქს თავზე.

— ადექი, სოსიკო, ადექი, ცოცხალი ხარ, ღმერთის მადლმა, ნუ გეშინიან, ადექი ბიჭო! დაჰყვიროდნენ სოსიკა-ბიქს თავზე: შეგშინებია, სოსიკო, შეგშინებია, ვერ დაგბეგვა დათვმა ვერა!

როგორც იყო სოსიკა-ბიქმა გაახილა თვალები, მაგრამ ისევ მალე დახუჭა.

— ავად ვარ ავად! წაილულლულა სოსიკა-ბიქმა და მიწვა მხარ-თეძოზედ.

— გიორგა, ჰა გიორგა, ეუბნებოდა ერთს ახალგაზდა ბიქს, რომელსაც მხარზე გაედო უხარმახარი კეტი: ერთი ქული მომიძებნე, გეთაყვა, ქული, ჩემი ქული! თევდორას სიტყვაზე ყველანი დატაცურდნენ, დაუწყეს ძებნა და შვიდად გაგლეჯილი მოუტანეს თევდორას ქული. ეს ქული აღარ დაიხურებოდა. ერთი თეთრი, ოფლისაგან გაშავებული თიკვი იშოვნეს და ის წააკრეს თევდორას თავზე. თევდორა მაინც არა კვნესის. წყლულები შეუხვიეს დაქრილებს: ვინ ჩოხა დახია ნაქრებად, ვინ ახალუხი. თევდორას შეუკრეს მაგრად გაჩეჩვილი მკლავი და თეძო. თევდორა მაინც კიდევ არა კვნესის.

— წორედ რკინიჰ კაცია, ეგ ოჯახქორი, დასწყევლა ღმერთმა! ნახევარი კაცი აღარ არის და დახეთ, თუ ერთი ამოიკვნესოს, კაცო! იძახდნენ

მონადირეები.

თევდორა მაინც არ კვნესოდა, წყლულები სურდო-ხველადაც არ მიაჩნდა. ორი ბიჭი სოფელს აფრინეს, რომ სოფლელთათვის ეხარებინათ დათვის სიკვდილი და თან ორი ურემიც წამოეღოთ: ერთი დათვის წასაღებად, მეორე დაქრილთათვის. მონადირეთ ეხლა დრო მიეცათ დათვზე ნავარდობისა. მიეხვივნენ ყველანი მკვდარს დათვს, ვინ კეტსა სცემდა თავში, ვინ კიდევ ნაჯახის ყუას კბილებში ურახუნებდა და თან უგინებდა ცოდვიანს კბილებს, ვინ შუბსა სჩრიდა ხახაში. დათვი უგრძნობლად ეგდო გულ-აღმა; გულზედ ხელები დაეკრიფა მკვდარის კაცივით, ჩამოსდიოდა სისხლი წყალივით თითქმის ყველა ასოლამ.

VIII.

მზეს ერთი შუბის ტარი-და ჩაუდიოდა, რომ ურმებმა მოიღეს ქრიალი. უკან მოსდევდნენ ქვითინით ქიტესასი და სოსიკა-ბიჭის ნათესავები. ყველაზე შესაბრალისი სოსიკას დედა იყო, ამ ერთად ერთის შვილის მეტი არავინ გააჩნდა საბრალოს და ესეც ხელიდამ მისდიოდა თითქმის. შორიდანვე ისმოდა სოფიოს, სოსიკას დედის, ქვითინი.

— სადა ხარ, შვილო, სოსიკო!— ქვითინებდა სოფიო: გენაცვალოს, გენაცვალოოოს დედა-შენი, შვილოო! რად გამოგვზავნე დათვზე მე თავ-მკვდარმაა! ვინღა დამმარხავს მე საბრალოოს?! მაშ ალარ მელირსება შენის ხელით მიწა, შვილოო?! რატომ შენზე წინ მე არ მოვკვდი! რად შინდა სი-ცოცხლე! ვილასათვის და ვისთვის ვიცოცხლოო?!

ქიტესას ცოლ-შვილიც არა ნაკლებ დასტიროდა ქიტესას. მარტო თევდორას არა ჰყავდა დამტირები, არავინ ჰგლოვობდა იმის უბედურებას. ან-კი ვინ იტირებდა თევდორას? და იმას არა ჰყავ, ძმა და ცოლი, ბიძა და ბიძაშვილები, ერთი ლიტონი კაცია.., თავისი თავი თითონ არ ებრალებოდა, სხვა ვინ შეიბრალებდა თევდორას? ამითი გულს არ იტეხდა თევდორა, ვილასაც რუსული ფარაჯა წაეხურა თევდორასათვის და ურმიდამ წინანდებულად გამოიქყიტებოდა, წინანდებურად ისე, რომ საათში ერთხელაც არ ახამხამებდა თვალს. იმის გვერდზე იწვნენ ქიტესა და სოსიკა-ბიჭი. ეს უკანასკნელი როგორც იყო მოასულიერეს, მაგრამ მაინც კიდევ ავადობასა სჩიოდა. თავი დედის კალთაში ედო... მეორე ურემზე დათვი დაუდეს... დათვის სიკვდილმა ცოტა არ იყოს, რომ დედაკაცებს მწუხარება შეუშსუბუქა, რამდენიმე ქვა და გუნდა კიდევ თავის მხრით იმათ მიაყარეს დათვს, წყევა-კრულვა ხომ სხვა იყო.

მონადირეებს, დათვის მოკვლისაგან გახარებულებს, დაკრილთა მწუხარება დაავიწყდათ და სიძლერით გამოჰყვნენ უკან ურმებს.

IX

შუა ღამე მოტანებული იქნებოდა, რომ გამარჯვებულები შევიდნენ სოფელში. მოგროვდა ხალხი დიდი და პატარა, ქალი და რძალი დათვის სანახავად. ყველანი განცვიფრებით შესცქეროდნენ დათვის სიდიდეს, იმის გოდორივით დიდ თავ-ყურს.

მოჰკალით დათვი?—კითხულობს ერთი.

— მოვკალით და ვგრე!—უპასუხებს ერთი მონადირეთაგანი.

— მართლა მოჰკალით? მორბის მეორე და იმასთან სხვანი მრავალნი.

— მოვკალით და მერე როგორ მოვკალით? ბოლი ავადინეთ ზურგზე! უპასუხებენ მონადირენი.

— მართლა, მართლა მოუკლავთ, რამოტონაა ეს ვერანა, ერთი უცქირეთ-და!—იძახიან სეირის სანახავად მოსული სოფლელები.

დათვი მეორე დღეს შუადღემდე სოფლის შუა მოედანზე გასატყავებელი ეგდო და ყველანი მოდიოდნენ და სინჯავდნენ, მკვდარს დათვზე

ჯავრს იყრიდნენ. სოფელში კუტიც-კი აღარ დარჩა, რომ არ მოსულიყო და მკვდარის დათვისათვის წიხლი არ ჩაეზილა.

თევდორასა და ქიტესას სოფლის დედა-კაცი დაადგა თავს, არჩენს ორივეს. ორივენი რჩებიან, ღვთის მადლით, კარგათ არიან. თევდორა უფრო ყოჩაღად არის, ეხლა უფრო გამამაცდა და არამც თუ საათში, ორსაათშიაც-კი აღარ ახამხამებს თვალებსა და ვეფხვივით გამოიციქირება.

დათვის-კი სცემს ხალხი თავში და პირში. რამდენიც დაარტყამს, იმდენი დასძახებს თავზე: ამოგშხამდა სოფლის შეწუხება?! მოკვდი, მოკვდი, ეგრე მოკვდი!“

უძლური ვირი

(ძველის-ძველი ამბავი).

ვირი დაბერდა. პატრონისათვის ხელსაყრელი აღარ იყო. თვალები ჩაუძვრა, ყურები გაუტიტვლდა. ზურგი მთლად გადაღვლილი ჰქონდა; ცალიერს, ხმელს ძვლებზე ხმელი, დაბეგვილი და დაკოყიებული ტყავი ეკრა. რამდენი სახრე, რამდენი კეტი მოჰხვედრია საბრალოს ზედ დაკიჟინებით: „აჲ, შე მუდრეგო, გადადგი ეგ ოხერი ფეხებიო“.

ბევრი, დიდი ჯაფა უნახავს იმის ზურგს. თედოებიც დახუთული ჰქონდა, წელ-მოწყვეტილსა ჰგავდა.

ვირი ეზოში იდგათავ-დაკიდებული და ჰფიქრობდა თავის ყოფნაზე. ჰგრძნობდა დაუძლურებას, ჰგრძნობდა, პატრონი ისე აღარ მომივლის, როგორც წინადაო, რადგანაც უსარგებლო-ღა ვარ, ფეხებს მე ველარა ვხმარობ და წელსაო.

ვირის პატრონიც ამბობდა; „რა უნდა უყოს კაცმა ამ ვირ-ტიალს, შენახვად აღარ ღირს, ყიდვით აღარავინ იყიდის. მართალია, დიდი ამაგი

აქვს ჩემს თავზე, მაგრამ უნდა წავიყვანო და გავუშვა მინდორში, ნადირი მაინც შესქამს, მაღლია. საკმელი—თივა და ბზე იმდენი არ არის, რომ დავაბა და ვაქამო. თოფით მოვკლა? ტყვია-წამალი სად არის იმდენი, რომ ამაზე ვხარჯოვო. ისევ გაშვება სჯობია“. ვირის პატრონი მართლაც ასე მოიქცა: ჩაუბა ვირს ყელზე წნელი და წაიყვანა მინდორში. ვირი და მისი პატრონი ტაატით მიდიოდნენ, რადგანაც ვირს სიარული უჭირდა.

— სად მიგყევარ, ჩემო პატრონო, შემკმაზავდი მაინც, ტიტველა ზურგზე რას ავიკიდებო? უთხრა ვირმა თავის პატრონს, როცა სოფლის ნაპირს გავიდნენ და დიდს, ტრიალს მინდორს მოეკიდნენ.

— საძოვარზე მიმყევხარ, ჩემო მერანო, საძოვარზე, უპასუხა პატრონმა.

— ვაჰმე, ვაჰმე, სთქვა ვირმა: ამისთანა დროს, ამოდენა თოვლში რას მოვძოვ, შე სულ კურთხეულის შვილო?! არა, შენ სხვა რაღაც გიდევს გულში. მოგწყინდი განა? დაუძღლურდი, ველარაფერს გიკეთებ და იმიტომ მომიძულე განა? ოცი წელი ხომ მაინც შენი ყმა და მუშა ვიყავი, შე კაი კაცო,—ერთი ორი კვირა რა გაგიხდებოდა, რო შეგენახე? მე ხომ, ეს არის, სული კბილით მიჭირავს და, საცაა, გადავბრუნდები და მოვკვდები.

— მართალია უპასუხა პატრონმა: შენთან პირ-შავი ვარ. მაგრამ რა ვქნა, ჩემო ვირო, რა წყალს ჩავეუდგე? ეხლა უნდა სხვა ვირი ვიყილო, აბა სად შემეძლო თქვენი, ორივესი კვება; შენ მინდორში გაგიშვებ, ჯათა არაფერი გექნება, თავისუფლად იქნები. ისე თავის დღეში არ გაკრიჟანგდება ბუნება და დედა-მიწა, რომ ათასში ერთგან კიდევ არა სჩანდეს მინდორში ხმელი ჯოყარი და შამბი. მიიარ-მოიარე და დაარჩინე შენი თავი. ვწუხვარ, მაგრამ რა ვქნა? მაგონდება განა არა, შენი დიდი ამაგი ჩემზედ და ჩემს კოლ-შვილზედ, ბევრი ვიფიქრე და ამის მეტი ველარაფერი მოვიფიქრე, მოსაკვლელად ვერ გაგიმეტე.

— ეჰ, არ მემართლებოდნი-კი ამას, ჩემო პატრონო, მაგრამ რა ვუყო, რა მეთქმის, პირში წყალი მედგა, მადლობა უფალს! დიდება იმის სახელს, ვინც ჩვენ ვირები ასე დაგვაარსა და ასეთი ბედ-ბოლო დაგვიწერა. სჯობდა-კი, რომ თოფი წამოგელო და მოგეკალი. მაინც მე ხომ არაფერი მიხსნის მგლების პირიდან, უნდა მწეწონ, მტანჯონ. ტყვია-კი სწრაფად მომიღებდა ბოლღს და მერე მკვდარი ლეში საცა უნდა ყოფილიყო, თუნდა ყვავს ეზიდნა, თუნდა ყორანს.

სალამო ხანი იყო, რომ პატრონმა ვირი დანიშნულ მიჯნაზე მიიყვანა ტრიალ შუა მინდორ-

ზე, სოფელზედ კარგად მოშორებით, შეჰხსნა წნელი ყელიდამ და გაანება თავი.

— ეხლა მშვიდობით, ჩემო უწყინარო, უჩივარო, მომთმენო ვირო, ღმერთსა ვთხოვ კარგათ იცხოვრო, არაფერი დაგიშავდეს, არ შეგციოდეს, არ მოგშიოდეს, არ მოგწყურდეს. სთქვა ეს პატრონმა და გამობრუნდა წამოსასვლელად.

— მაშ მანებებ, მანებებ თავს, ჩემო პატრონო, აღარ იშლი? შენც მშვიდობით! ღმერთსა ვსთხოვ, ჩემზე ორ-წილად ღონიერი ვირი გეშოვოს, ორ-წილად ჩემზე მეტს იკიდებდეს ბარგს და ოთხ-წილად ნაკლებს საქმელსა სჯამდეს; იქნება იმას მაინც ესეთი საქმე არ დაემართოს, როგორც მე. სთქვა ეს ვირმა სასო-მიხდილის ხმით, პირი სხვა მხარეს მიიბრუნა, აღარ უნდოდა დაენახა თავისი პატრონი, თვალებიდამ დაპა-ღუპით ცრემლები გადმოსცივდა, მუხლთ მოეკვეთა და იქვე ადგილობრივ ჩაწვა თოვლში.

ვირის პატრონიც გაჰქრა. ცივი ქარი ჰკრფოდა გადალესილ თოვლზე ნამქერსა და ჰაერშიათამაშებდა!...

დარჩა ვირი მარტოთ, მარტო ღვთის ანაბარობაზე. ეხლა მისი პატრონი იყო მალლიდამ მოწმენდილი ცა, დაბლა—თოვლით გადალესილი მინდორი. ადგილ-ადგილ მინდოზე გორად იდგა ქარისაგან მინამქრული თოვლი. პატრონმა რომ

უთხრა ვირს, მინდორში შენს საკმაოს კიდევ იშოვი ჯოყრებს და შამბსაო, ტყუილი გამოდგა: მწოლიარე ვირი თვალს ავლებდა გარეშემო, მაგრამ იქ მცენარის ხსენებაც არსად იყო. თითო-ოროლა ეკლის ჯაგი მოსჩანდა მინდორზე წერტილივით. დაბნელდა, ქარმა მრისხანეთ ღრიალი მორთო და გაპენტის თოვლს ეზიდებოდა ერთის ადგილიდამ სხვაგან. ვირი სიკვდილს ელოდა: სხვა მოსალოდნელი მას წუთი სოფელში არაფერი დარჩენოდა. მიმიბარეო, ევედრებოდა თავის გამჩენს. შორს სადღაც აყმუვედა მგელი, ხმა გააგძელა საზარელის კილოთი. ცოტა ხანს შემდეგ სხვა მხრიდამ მოისმა ყმუილი, ახლა სხვიდამ, ასე რომ ოთხსავე მხარეს გაიმართა საზარელი ხმაურობა.

— მოდით ჩქარაო, ამბობდა ვირი თავისთვის, მაინც თქვენი კერძი ვარ და მაინცაო. ვირს თვალწინ წარმოუდგა თავისი წარსული, თავის ცხოვრება და მწარედ ამოიკვნესა: რისთვის ვიცხოვრე, რისთვის ვიტანჯე? ვიტანჯე, წელი მოვიწყვიტე და ეხლაც ტანჯვით უნდა მოვკვდეო, ამბობდა დაღონებული. მადლობა შენთვის, უფალოო, სთქვა და დაასვენა თავი თოვლზე. ნეტავი არ მალოდინონ და ჩქარა მოვიდნენ მგლები, ჩქარა შემქამიანო. „ლეგ-ჩოხა ბიკებმა“ არ იცოდნენ ვირის უპატრონოდ ყოფნა მინდორზე,

თორემ დაპატიყება არ უნდოდათ. სიმშილისაგან შეწუხებულნი დალაწლაწებდნენ მინდორზე და ქვაც რომ დაენახათ, ისიც ხორციელი არსება ეგონათ და ზედ ჰვარდებოდნენ შესაკმელად: ვირს რას დაიხვალიებდნენ..

ვირს რალაც ხმაურობა შემოესმა.

— თოვლის ხრიალ-კრიალი და მალლა ფეხის ცემა. ვირმა იფიქრა, ეგ არის დამეცა მტერიო. მოდი ნუ დავინახავ მაინც ჩემის ხორცის მკამელსო, სთქვა და თვალები დახუჭა, თავი უფრო დაბლა დაჰკიდა, თითქმის თოვლში ჩააფარა.

— გამარჯვება შენი, ძმობილო, ვინა ხარ? რა სულიერი ხარ? მოესმა ვირს ხმა.

ვირს ჯერ არ უნდოდა აეხედნა, მაგრამ იცნო, ეს ხმა მგლისას არ ჰგავდა, აიხედა მალლა და დაინახა თავზე წამომდგარი, ყელ-მოღერებული, თვალე-მოელვარე რქა-ბუდიანი ირემი. ისეთი ბოჯოჯლი რქები ჰქონდა ირემს, გეგონებოდათ ბებერი მუხა სდგას იშის თავზეო. იმას ორი სხვა ამხანაგი ეტანა— ერთი ისევ ხარი და მეორე ფური-ირემი

— ვირი გახლავარს, თქვენნი ქირიმე, უპასუხა ვირმა, რა დაინახა, რომ სანდო ხალხნი იყვნენ.

— აქ რას აკეთებ ამ დროს, შე საცოდავო? განაგრძო ხარ-ირემმა: ამ სიცივეში, ზამთარში

გარედ შინაურ ცხოველს რა უხარიან?? ჯერ ჩვენ ტყეში დაბადებულთ და გამოზრდილთ გვეძნელება ამ დროს ცხოვრება!?

— პატრონმა მომიძულა, ძმობილო, მანამ ჯანი და ღონე მქონდა მამუშავებდა და ეხლა, რაკი ღონე დავკარგე და დავუძღურდი, დავბერდი, გადმომავდო ამ ტრიალს მინდორზე, — უპასუხა ვირმა ამოოხვრით.

— არ მიკვირს, ძმაო! ჩვენ იმითი ვართ ბედნიერნი, რომ კაცის ხელში არა ვართ, იმას არ შევხედავთ თვალ-წარბში, ჩვენი თავი ჩვენვე გვაბარია სიყრმითვე და არ გვიკირს ცხოვრება. შენ რომ დაუჩვეველი ხარ, ასეთს ცხოვრებას ვერ აიტან... ეგეთია ადამიანი. ვიცნობთ ჩვენც ადამიანის შვილებს, თუმცა ტყეში ვსცხოვრობთ და ნადირებს გვეძახიან. კაცზე შეუბრალებლები, აგერ ისინიც არ არიან. დამერწმუნე, რომ სადავლოთ ეძახიან ერთმანეთს. ირემი მგლების ყმუილზე ეუბნებოდა, -- შეუბრალებლობა მეტი იქნება? რა დავუშავეთ ჩვენ ადამიანს, რა შევუსვით, რა შევეუქამეთ, რომ ჩვენ არ გვაძლევს მოსვენებას და გვდევს მოსაკლავად!? აი ეხლაც მონადირეებისაგან დამფთხლები მოვდივართ თავის ბინაშივე. ადე, წამო, წავიდეთ, ძმობილო, ჩვენთან იცხოვრე, ჩვენც შეგეწევით, უთხრა ხარ-ირემმა.

— სად შემიძლიან, გეთაყვანეთ, თქვენთან

სიარული, ფეხებს ძლივს დავათრევ..

იქნება, არ გვენდობი? შენ არ იცი, რომ ჩვენ ნათესავობა გვაქვს ერთმანეთში, თუმცა-კი შორეული მაგრამ მაინც ნათესავობა ჰქვია. თუნდა ეს არ იყოს, თქვენსა და ჩვენს ნათესავობას ქვეყნის დასაწყისიდან ერთმანეთში არავითარი ბეწვის ტოლა მტრობაც არ მოაგონდება. ჩვენ ჩვენთვის ყველაფერს ვეცდებით. შენ რომ კაცი იყო, სიცივისაგან დაკრუნჩხული, სულთმაბრძოლი და ჩვენ ხელთ ყოფილიყო გადარჩენა, ზედაც არ შემოგხედავდით, ახლოც არ გაგივლიდით, მაგრამ შენ ჩვენი თანამოძმე ხარ, ადე, წამო, ჩვენთან, წამო, ძმობილო, ჩვენთან იცხოვრე. აქ შენ ხეირს ვერა ჰნახავ.

— განა არ გენდობით, თქვენ თავს შემოგველოსთ ჩემი საცოდავი თავი, მაგრამ რა ვქნა, განა გეხუმრებით, ფეხებს ძლივს დავათრევ, თეძოები დახუთული მაქვს, წელი თითქმის მოწყვეტილი მაქვსო, ტანიდან მოშორებულიო, ისე მგონია. სთქვა ვირმა: ცარიელი ძვლები-ლა ვარ.

— ნუ გეშინიან, რაკი ეგრეა, რას მიკეთებს რკები, მე წაგიყვან, ძმობილო. ადე ზეზე, ადე-ქი ჩქარა, თორემ, აგერ საცაა, ძვლები მოგვეწვევიან, გავეშუროთ.

ვირი რის ვაინაჩრობით ადგა ფეხზედ. ირემმა წაიწოდა თავის ღონიერი კისერი და შეიგღო

ვირი რქებზედ,

— წავიდეთ ჩქარა, — შეუძახა მან თავის ამხანაგებს, — მე მომყევით, — და შეიკაპარავა მძლავრმა ცხოველმა. როგორც ქარმა ბუმბული მოიტაცოს, ისე მოიტაცა ვირი მან.

ჩემი რქების სიმძიმეც არ გქონიაო, უთხრა ირემმა ვირს. ცოტა მანძილი რო გაიარეს.

— რალა სიმძიმე მექნება, შენ გენაცვალოს ჩემი ბეჩავი თავი, ცარიელი გამოხრული ძვალი და ტყავი ვარო. უპასუხა ვირმა, ირმის რქებზე არხეინად მწოლარემ.

ირმები მიეშურებოდნენ მალალის მთისკენ, დიდ შავ ტყისკენ. ვირიც იქ მიჰყავდათ. იმათ ნაფრენს მინდორზე თვალს ვერ გადუწვდენდა კაცი...

III.

ნახევარ-საათმაც არ გაიარა, რომ ვირი, ირმის რქაზე განსვენებული არხეინად, ეხლა დიდს უღრანს ტყეში იყო. იმან თავისუფლად ამოისუნთქა. ჰგრძნობდა რალაც კაი მომავალს, გულიც ამას ეუბნებოდა: „უთუოდ აქ არ მოვკვდებიო“. ირმები დიდს ფერდოს შეუდგნენ, ერთს გორის ფხას დაადგნენ და იმაზე მიდიოდნენ. ამ ტყეში უზარმაზარი ხეები იდგა, თვალ-აუწვდენელი. ვირს ძა-

ლიან ჰშიოდა. იქნება ცოტაოდენი ნეკერი მოვ-
ხოხნოვო, იფიქრა.

— დავისვენოთ, ძმებო, ცოტახანს, სიმშილმა
შემაწუხა, — სთქვა ვირმა, — იქნება ცოტაოდენი სა-
ქმელი რამ ვიშოვოთ.

ძალიან კარგი იქნება, — უპასუხეს ირმებმა, — ეს
საშიში ადგილი არ არის, საჭმოც საკმაოდ იშო-
ვება. მართლაც ტყეში სრული მყუდროება იდგა.
დიდი შავი ტყე გამტკნარებულისყო, თითქოს ყურს
უგდებდა მალა ცას, დაბლა დედა-მიწას. ირმებმა
ვირი დაბლა ჩამოსვა...

— შენს მხარ-ბექს ვენაცვალე, ძმობილო, რო
ბუზადაც არ გაგაჩნია, ისე მზიდავ. ახ ნეტავი
ღმერთმა მაცოცხლოს კიდევ იმდენი, შენი სიკე-
თე როგორღე გადავიხადო. ერთს დროს-კი მეც
შეძლებული ვიყავი. ვაჰმე, ოჰ, წელი, სთქვა ვი-
რმა. თოვლში ისე ჩაეფლო, რომ ნახევარი კისე-
რი და ყურები-ღა უჩანდა.

— ღმერთმა ჰქნას, ცოცხალი იყო, ვინ მო-
ელის სიკეთის გადახდას. განა იმიტომ გზიდავ,
რომ ვირმა სიკეთე გადამიხადოს; არა, ძმაო, გუ-
ლი მეუბნება მოგეშველო, როცა გიქირს და გე-
შველები. მაშ როგორ იქნება?

— ღმერთმა გადაგიხადოს ჩემ მაგიერი სიკე-
თე, ვსთხოვ ჩემის ცოდვილის პირით, ღმერთმა
გიშველოს. ირმებმა დაიწყეს საქმლის ძებნა და

აქეთ-იქით სიარული. ხარ-ირემმა რქით ჩამოუნტვრია რცხილისა და წიფლის ტოტები. ვირმა გემრიელს ნეკერს წისქვილივით ფქვა დაუწყო, მისი ხრამა-ხრუმი შორს ისმოდა. ირემმა ორიოდესამი ფეხი მაყვალის უპოვა, გადმოუქეკა ფეხით და მიიწვია თავისი მეგობარი. ვირი ამასობაში კარგად გამოძღა და ცოტა ღონეც მიეცა. ფურმა ირემმა ხის ხავსი მოუტანა და დაუყარა წინ.

— შეექეც, ძმაო, ჩვენი ზამთარში მასაზრდობელი ეს არის, ჩვენ ამითი ვსუქდებით, უთხრა ფურ-ირემმა.

— ღმერთმა გიშველოთ, მეც არ დავიწუნებ ამ მწვანე ხავსს. უთუოდ გემრიელი იქნება, სთქვა ვირმა და წაუსო იმასაც. ირმები დიდრონს ხეებს, სადამდინაც პირს მიუწვდენდენ, აცლიდნენ ხავსს და ისე შეექეოდნენ, როგორც მწვანე ბალახს.

როცა კარგა გამოძღნენ და ცისკარმაც ამოაშუქა, ირმებმა სთქვეს, დროა ვიმგზავროთო. ახლა მეორე ხარმა მოინდომა ვირის ზიდვა რქითა, მაგრამ რქა-ბუდიანმა ფიქრი დაუწუნა, შენს რქაზე გვერდებს იტკენს, შენ „რქა-ბიწალა“ ხარ, არც გაიმართება ზედო. ვირმა ფეხით სიარული მოინდომა ოღონდ გზა გაეკვალათ იმისთვის.

ირმები გაუძღნენ წინ. ისინი მკერდით მიარღვევდნენ თოვლსა და ვირიც უკან ჩანჩალით მისდევდა. ვირი მალე დაიღალა და რქა-ბუდიანს

ისევ რქით მოუნდა მისი ტარება. განთიადისას ერთს ჩაბნელებულს, დაბურულს ადგილას მივიდნენ, მაღალის მთის ძირში მიახწიეს. აქ ისეთი სიჩუმე იდგა, კოდალის ნისკარტის ჩქამიც-კი არსაიღამ ისმოდა. დიდრონი ხეები წვერებით ცას ებჯინებოდნენ, თავით ბოლომდე ხავსით და ფითრით დაბურულნი. დიდრონი მაყვლის ბუჩქები ერთკუა იმათ გარშემო. თოვლი აქ ნაკლებ ილო, მაღლობი ადგილი იყო და თოვლი მალე დნებოდა, ბრძამი და ლელი, მაღლიღამ დაბლა ჩამოწოლილი, *ხალიჩასავით ეფინა მთელს იმ ფერდას-

— თვალ-შავავ, ჰეი, თვალ-შავავ, დაიძახეს ირმებმა, ერთს ტაფობს რომ მიუახლოვდნენ.

— ვინ არი? მოისმა ხმა დიდრონ წამოქცეულ ჭანდრის გვერდზე მაყვლოვანიღამ და თანაც გამოჩნდა უზარ-მაზარი, მოშავ-ფერო ირემი. მისი დიდრონი ხავსიანი რქები ტყეს უსწორდებოდა.

— ჩვენა ვართ. უპასუხეს ირმებმა და მიეშურნენ თვალ-შავასთან.

— აი, ერთი ამხანაგიც ვიშოვნეთ, — მიახარეს, — მარტოობა აღარ შეგაწუხებს. ჩვენ მუღამ შენთან ვერ ვიქნებით და ესა გყავდეს. ეს პატრონისაგან მოძულეებული, უთვისტომო, ობოლი ვირი, — უთხრეს ირმებმა.

თვალ-შავას ძალიან გაუხარდა, აქო ირმების ქველობა: ყოჩაღ, რომ შებრალება გამოგიჩენიათ

ამ საცხადავისთვის, — უთხრა მან. — ეხლა ჩვენ თითონ ვიცით როგორც ვიცხოვრებთო.

თვალ-შავა თითონაც ხანში შესული დამძიმებული ხარ-ირემი იყო, იმას ბევრი ჩანჩალი აღარ შეეძლო და ირმებმა ეს ბალდადი კუთხე უშველებელის ტყისა მიუჩინეს იმას საცხოვრებლად. სხვა ირმები ერთს ბეწვს ბალახსაც-კი არ მოჰგლეჯდნენ ამ ადგილას. ისინი სხვა-და-სხვა ადგილებში სძოვდნენ, სხვაგან გამოდიოდნენ იოლად. ეს ადგილი „დამძიმებულ“ ხართა საცხოვრებლად იყო დანიშნული, საქმო საქმო იყო აქ ზამთარ-ზაფხულ და წყალიც. შიგვე „სალოკავებიც“ აქვე მარჯვედ ჰქონდა. ირმებმა ერთმანეთი მოიკითხეს და მერე ერთმანეთს განშორდნენ. დარჩნენ ერთათ თვალ-შავა და ვირი.

— აი, ჩემო მეგობარო, ეს ადგილი მე და შენ გვეკუთნის, რამდენიც გენებოს, იმდენი მიირთვი, დამშლელი არავინაც არ არის, — უთხრა თვალ-შავამ თავის მეგობარს, — ბრძამი გნებავს, ლელი თუ მაყვალი ან ხავსი, ყველა შენს ნებას არის.

— დიდი მადლობელი, შენი ჭირიმე, ჩემო ბიძიავ, — სძქვა ვირმა, — დიდი მადლობელი, ღმერთმა გიშველოთ, ღმერთმა დაგიხსნათ ყოველას ბოროტებისა და განსაცდელისაგან. ვხედავ, რომ ჩემთვის არაფერი გშურთ, ხოლო ეს მაწუხებს, მე დიდხანს აღარ ვიცოცხლებ, ჩემი ღღე დათვლი-

ლია, ხანში შესული ვარ, ვაი თუ შენ დაგაკლო საზრდო, შენ, რომელსაც სიცოცხლე გწადიან და წლოვანებაც სიცოცხლის შესაფერი გაქვს. თუნდ ესეც არ იყოს, მე წეტივეს ვერ გაღვეურჩები, ზამთარში გარედ ყოფნას დაჩვეული არა ვარ.

— ნუ გეშინიან, მეგობარო, ერთს კირსაც ვუწამლებთ და მეორესაც, შენ რამდენი წლისა იქნები? ჰკითხა თვალ-შავამ.

— მე, ბიძია, ვარ სწორედ ოცის წლისა, უპასუხა ვირმა.

— ოცი წელი რა სათქმელია, შე კაი კაცო, მე ვიქნები ოთხმოცის წლისა, მაგრამ თუ მტერი დაგვეცა, მე ხუთის წლის ირმებიც ვერ მისწობენ წინ, სთქვა ირემმა.

— ეჰ, რას ბძანებ, შენი კირი მე?! — სთქვა ვირმა, — თქვენი საქმე სხვაა, მე ჯაფამ დამაძაბუნა, ჯაფამ, დიდმა ჯაფამ, დღე და ღამ ტვირთის ზიდვამა. სულ ჩაეყელი ვარ. დამაწყობდა ჩემი პატრონი იმდენს შეშას, რომ ყურებისა და კუდის მეტი აღარათფერი მიჩანდა და თანაც სახრით მიბლარტუნებდა ფეხებში და თეძოებში. მე რაღა მეშველება?.. სულ ტყუილია!

— საწყალო! ღმერთი მოწყალეა, ფიქრი არ არის, სიცივე გაშინებს. მოდი აქ, უთხრა თვალ-შავამ, მოდი და ჩემს ნაწოლში ჩაწექი. ვირი მივიდა და ჩაწვა ირმის ნაწოლს თოვლში, როგორც

აკვანში. მართლაც ისეთი სითბო იგრძნო, თითქოს კარგს თავლაში ყოფილიყოს დაბმული.

— ოჰ, მართლაც, რა კარგად, რა თბილათა ვარ, ბიძავ! — წამოიძახა ვირმა, — შენ სადღა უნდა დაწვე?

— მე ხომ გითხარი, გეშველება მეთქი! — სთქვა თვალ-შავამ; — მეც აი აქ შენს გვერდით დავწვები, ჩემთვის სხვა საწოლს გავიკეთებ და, როცა სიცივე იგრძნო, მითხარი, ნუ დამეხათრები, გადმოხვალ შენ ჩემს ახალს საწოლში, მე ისევ მანდ დავწვები; ასე, შენი საწოლი მუდამ თბილი იქნება.

ვირს გულში სიამოვნება, მადლობის გრძობა აღედრა და თვალებიდამ ცრემლები გადმოსცვივდა.

— ღმერთო, შენ უშველე ჩემს მშველელთ, ღმერთო, ნუ ჩააგდებ ამათ შეუბრალებელის კაცის ხელში! ბუტბუტებდა ვირი თავისთვის.

— შენ რომ უძლურებასა სჩივი, ჩემო ძამიავ, — განაგრძო ირემმა, — მაგის წამალიც ჩვენს ხელთ არის ღვთით მაგასაც ვუშველით; ჩვენ, თუ გაგიგონია, ჩვენი პატრონი გვყავს, იმას ამ ადგილის დედა და ნადირთა პატრონი ჰქვიან: იმას მე ძალიან ვუყვარვარ, უსათუოდ კვირაში ერთხელ დამხედავს და მოსალონიერებელს, გაახლების ბალახს მომიტანს. იმ ბალახიდამ შენც გიზიარებ. მაშინ გამოჩნდება, თუ შენ უძლური ხარ, თუ ირმები შენ გაგასწ-

რებენ, ჰნახავ, როგორ მოგემატოს ღონე როგორ
ტანს აიყრი. ვირი სიხარულით და სიამოვნებით
ცას ეწეოდა და სიხარულის კრემლებსა ჰღვრიდა.

IV.

ვირი მას შემდეგ, რაც თვალ-შავასთან და-
ბინავდა, მუდამ მაძლარი იყო; სიცივე იმას არ
უგრძენია, მუდამ თბილს ირმის ნაწოლში იწვა, მაგ-
რამ წელი, გვერდები და მენჯები ზაინც სტკივოდა.

კვირა დღე გათენდა. თბილი მზიანი დღე გა-
მოვიდა. ამ ორის მეგობრის სადგურის ფერდო ჩა-
მოშრა; ის ლამაზი სანახავი იყო მაშინ, ბრძამით
და ლელით დაფარული. დამაძღრები, თვალ-შავა
და ვირი, გვერდის-გვერდ იწვნენ. ფოთლის შრია-
ლი შემოესმათ. თვალ-შავამ ყურები აცქვიტა,
ხოლო ვირი-კი თავდაკიდებით იწვა, ღრმა ფიქ-
რებში გართული.

მაყვლოვანის გვერდზე გამოჩნდა ნელის ნა-
ბიჯით, როგორც აჩრდილი, ლამაზი, პატარა ქა-
ლი. გაშლილი შავი თმა ღრუბელივით ედო ტან-
ზე. მარცხენა ხელში პატარა ბალახის კონა ეპყრა
თვალ-შავა, რა წამსაც-კი დაინახა თავისი პატრო-
ნი, მაშინათვე ფეხზე წამოდგა და გაიზმორა. კი-
სერი მალლა აიწოდა და თავისი დიდრონი ხავსია-
ნი რქები ჰანდრის ტოტებს მიაბჯინა.

ვირი ისევ ისე იწვა, თავ-დაკიდებული. ის ვერაფერსა ჰგონობდა და ვერცა რასა ჰხედავდა.

ქალი სიხარულით პირ-განათებული მიესალმა თვალ-შავას. ირემმა თავი დაბლა დაულო, ყელ-ყურში ფხანა დაუწყო ქალმა.

— როგორა ხარ, ჩემო სილაღევ? — ჰკითხა მან ირემსა, — აი ბალახიც მოგიტანე.

— კარგადა ვარ, ჩემო სიცოცხლევ, ჩემო დე-დავ, — უპასუხა ირემმა, — მაგრამ ცოტა რამ სადარ-დო საქმე გამიხდა.

— ეგ ამხანაგი ვინ ვიშოვნია? ჰკითხა კვლავ ადგილის დედამ.

— ეგ არის კიდევ ჩემი სადარდო. ეგ ერთი საწყალი ვირია, ჩემო სიცოცხლევ, პატრონისაგან მოძულებული. ჩვენს ირმებს ეპოვათ მინდორში და აქ წამოეყვანათ. ჩვენ შემოგვეხიზნა საცოდა-ვი, ულონო, უსულ-ჯანო, დაბეგვილ-დაბეჟილი. განა არ იცი, ადამიანის ხელში რა ხეირსა ჰნა-ხავდა?!..

— ვიცი, ვიცი, საწყალი ცხოველი, — სთქვა ქალმა, — შებრალება, შეწყნარება გვმართებს, ჩემო თვალ-შავავ, მაშ როგორ იქნება?!.

— ადევ, ძმობილო, ხომ არ დაგეძინა? ადევ, ჩვენი პატრონი მოგვივიდა, უთხრა თვალ-შავამ თავის მეგობარს.

ვირმა ეხლა ძლივს გამოიფხიზლა და ყურე-

ბის ბლარტუნით წამოდგა. ქალის დანახვა ცოტად არ ექაშნიკა, რადგან იმასაც ადამიანის სახე ჰქონდა. ადამიანის დანახვა ტანში ჟრუანტელს ჰგვრიდა საბრალოს. დადგა მის წინ თავ-დაკიდებული.

— რად შემომხედე, მეგობარო, უგემურად? ნუ გეშინიან, მე შენ არ შეგკმაზავ და არ გაჯაფებ, უთხრა ნადირთა პატრონმა დალონებულ ვირს.

— ეხლა იმას გეხვეწები, ჩვენო სულის ჩამდგმელო, — სთქვა თვალ-შავამ, — ცოტა მაგ ბალახი-დამ, ჩემთვის რო მოგიტანია, ამ საბრალოსაც უზიარო. დაე, მე დამაკლდეს, ოლონდ ეს მოლონიერდეს.

— ძალიან კარგი, — სთქვა პატარა ქალმა, — აი გაიყავით, ხვალ კიდევ გნახავთ და ბალახსაც ბლომად მოგიტანთ; შევიბრალოთ ეგეც, დღეს ჩვენია, ჩვენის ადგილის შვილად დაწერილი, ჩვენმა ადგილმა უნდა შეინახოს. ქალმა ბალახი ორსავე დაუყარა. თითონ ჩამოჯდა მწვანე ბრძამზე, ამოიკვნესა და თვალებიდამ ცრემლები გადმოსცვივდა.

— რადა სტირი, თავს შემოგველე? ჰკითხა თვალ-შავამ ადგილის დედას. მისი ცრემლები რო ნახა, პირში ბალახი გაუხმა.

— წელან ვერ გითხარი თვალ-შავავ, ვითომ უნდა დამემალა შენთვის, მაგრამ ღამალვით რა იქნება, შენ მაინც გაიგებდი ადრე თუ გვიან: ლალა მოგვიკლეს გუშინ მონადირეებმა.

თვალ-შავაც ატირდა, ამ სიტყვის თქმაზე ბ-ა-
ლახის ქამას თავი დაანება და მწარედ ოხვრა-კენე-
სა დაიწყო.

— რა ამბავია? — იკითხა ვირმა, — ეინ ლაღა
მოუკლავთ?

— შენ რომ რქით მოგიტანა, მეგობარო, ის
მოუკლავთ, მიუგო თვალ-შავამ.

ვირმა მორთო ქვითინი, ერთ ადგილას ვე-
ლარ დგებოდა, დამტვრეულის მენჯებით აქეთ-იქით
დაიწყო ხანხალი და „ვაჰმე ძმაო,“ „ვაჰმე ჩემო
სიცოცხლის მომნიჭებელო“ — ვო, მოსთქვამდა...

ქალი გამოეთხოვა ორსავე და წავიდა ტირი-
ლით. ვირმა და თვალ-შავამ დიდხანს იტირეს,
იგლოვეს ლაღა, საღამომდე აღარაფერი უქამიათ.
პატრონის მოტანილი ბალახიც ისე ეყარათ წინ.
ირემი სწყევლიდა ადამიანის შეუბრალებლობას.
იმან უამბო ვირს თავის თავს-გადასავალიც. ცხრა-
ათგან აჩვენა ტანზე ნაისრალები. საღამომდე ასე
მწარედ გაატარეს დღე, საღამო ხანზედ-კი შეექ-
ცნენ ბალახს. ვირმა, როგორც ეს ბალახი შესქა-
მა, სრულიად სხვა ტყავი და ხორცი შეისხა. აღა-
რაფერს ტკივილს არა გრძნობდა, ერთბაშად გა-
მოიცვალა. ვირი უსაზღვრო სიხარულში იყო.

V.

ნადირთა პატრონი სიახლის ბალახს გაზაფხულამდე უზიდავდა ვირსა და თვალ-შავას. ვირი ისე გასუქდა, რომ ტყავში აღარ ეტევიდა, ტანიც ერთი-ორად მოიმატა. ირმებთან ერთად ისიც დანავარდობდა. თიჯქმის გადაავიწყდა, თუ ის ვირი იყო, თავი ირემი ეგონა. ხშირად დამაძღრები მწვანის ბალახით, ნამარილეცები, ისა და თვალ-შავა ერთმანეთსა ლოკავდნენ. ძლიერ შეუყვარდათ ერთმანეთი.

გაზაფხული დადგა, ამწვანდა მთელი არე მარე, საქმელ-სანოვავემ იმატა. დედამიწამ უხვად მიაწოდა საზრდო. ვირი ჰმადლობდა ღმერთს, რომ მან იგი ამისთანა ბედნიერებაში ჩააგდო. ხან-და-ხან მოაგონდებოდა თავისი წარსული და ტანში ჟრუანტელი დაუვლიდა. მოაგონდებოდა ლაღა, რკით რომ ატარა, და ცრემლები მოუვიდოდა თვალეებზე. ებრალებოდა თავისი მონათესავე ვირები, რომ კაცის ხელში იტანჯებოდნენ და ცდილობდა როგორმე ისინიც დაესხნა ტანჯვა-წვალებიდამ და გამოეწვია ველად, მაგრამ არ შეეძლო. წასვლით ვერ წავიდოდა, ეშინოდა კაცს არ ჩავარდნოდა ხელში, წერა არ იცოდა, რომ წერილით მაინც შეეტყობინებინა იმათთვის მათი უგუნურება. იყო ასე ორს წყალ შუა დარჩენილი

ზაფხულიც დადგა. ვირს ბალანი გამოეცვალა. ირმების ფერი დასცემდა. თუმცა, რასაკვირველია, იმათგან განირჩეოდა. მარტო იმ ადგილას, სადაც კეზისა და ჯოხისაგან დაბეჭილი ტყავი ჰქონდა, იქ მოთეთრო ბალანი ამოუვიდა. ეს ვირს ძლიერ უხდებოდა. მისი ბალანი ეხლა სრულიად სხვა იყო, ვიდრე მაშინ, როცა ის ადამიანის ხელსა და პირს შესცქეროდა. ხოლო დარჩა დაღიერთს ბარკალზე. ბარკალზე დაღად „ს“ იყო გამოხატული, რაიცა ჰნიშნავდა „სოლომონს“, მის უწინდელს პატრონს. არ იქნა და არა „ს“ არ ამოიშალა, ეხლა ის წითლის ბალნით იყო დაწერილი და ამ დაღით გაირმებული ვირი დასეირნობდა მთასა და ბარს თავისუფლად. ვირმა გულზე ქონი მოიკრა, როგორც ზევითაც მოვიხსენიეთ. ხან-და-ხან ჟინი მოუვლიდა და წამოიყროყინებდა, მაგრამ რა წამს ენას დასძრავდა, თუ თვალ-შაფა იქ იყო, დაუშლიდა.

— რა გაყვირებს, კაცო, — ეტყოდა, — გაგონილა, კაცო, მტერს ეძახოდეს ჰკვათა მყოფელი ადამიანი, მოდი, აქა ვარ, მომკალიო?

— მაშ ხარ-ირმებმა რადლა იცით ყვირილი შემოდგომით! მიუგებდა ვირი თავ-მომწონედ.

— ჩვენ რომ ვყვირით, მაშინ ვნებათაგან თვალ-აბმულები და ჰკუა-დაბნეულები ვართ, ჩემო კარგო!

— მე რაღა ჭკვიანი გგონივარ! ხომ ხედავ, ტყავი ხორცზე მასკდება. გული მემღერება; მაშ რა ვქნა, არ დავიყვირო? ეტყოდა ვირი თავმომწონედ და ორნივე სიცილს ასტეხდნენ. ერთხელ ამნაირი თავის შემაქცევარი გალობა კინალამ ძვირად დაუჯდა ვირს. ერთს ბექობზე გადამღვარი საღამოს ნიავეთ გულს იგრილებდა და სიამოვნებდა. ყროყინი მოუნდა და შეჰყვირა კიდევ. ქვეით ხევში მევირეები ყოფილიყვნენ. ვირის ყროყინი ვაიგონეს და გაეშურნენ იქიაკენ. თითონ სოლომონიც, ძველი მისი პატრონი, იმათში ვერია. კარგი რომ თვალით ვერ დაინახეს, თორემ თავს რაღას დაანებებდნენ. ვირმა გროვაში თავის ძველი პატრონი იცნო და ნაპერწკალივით გაჰქრა იმ ადგილიდამ. მევირეებმა კვალი ვერ იპოვნეს და უკანვე დაბრუნდნენ იმ იმედით, რომ ეგ უპატრონო არ იქნება, თავისი პატრონი ეყოლებათ.

VI

ვირი მაინც ვერ გაღურჩა უბედურებას. სოფელში ხმა დავარდა, რომ, ღმერთმანი, ტყეში ერთი გარეული ცხენი გაჩნდაო, ჯორის ფეხები აქვსო. ამ ხმამ ხელმწიფემღე მიაწია. იმან მაშინვე შეყარა თავისი ჯარი, თავის ქვეშევრდომნი და ვეზირებს უბრძანა, რომ თოკები გაებათ. მექამანდეებიც

მრავალი გამოგზავნა. უბრძანა: ან შეიპყარით ის გარეული ცხენი და აქ მომიყვანეთ, ან არა და თქვენც იმასთან ერთად გადიკარვენით, თვალით აღარ მეჩვენოთო!

ხალხი, სადაც ეს გარეული ცხენი ეგულე-ბოდათ, სადაც ხშირად ენახათ, იმ ადგილს შე-მოერტყა. ტყის გარშემო ალყა გაავლეს, ყველას თოკები ჰქონდათ გაბმული, მექამანდევები შუა გულს ტყისას მისდევდნენ, რომ ერთს-მეორეზედ შეეგდო და ქამანდებში გაებათ გარეული ცხენი.

მართლაც, მეფის გაგზავნილი კაცები თუმცა ბევრს ეწვალნენ, მაგრამ ვირი მაინც და მაინც შეიპყრეს. იქ ერთმა კაცმა მეორეს უთხრა: „სე-ხნიავე, ერთი უცქირე, როგორ სულ ჩვენებიანთ სოლომონას ვირსა ჰგავსო.“

თვალ-შავა-კი წაუვიდათ, რის გამო ფრიად გულ-ნაკლულად დარჩნენ. ეს „გარეული ცხენი“ გაბაწრული მოიყვანეს მეფესთან. გზა-გზა ვირი გულში სტიროდა თავის დატყვევებას, იცოდა რაც მოელოდა კაცის ხელში, მაგრამ რა გაეწყობოდა უნდა დაჰმორჩილებოდა თავის მწარე ყოფას.

მეფემ, რა დაინახა თავისი საფერხე, მეტის-მეტად გაუხარდა. იმავე დღეს უნაგირი დაადგა და საუკეთესო მხედრებს უბრძანა გაეხედნათ. ვირი ხალხს ისე აჩვენებდა თავს, ვითომც უნაგირი ჯერ არ ენახა და ყალბზე დგებოდა, ფრთხებოდა,

ფრუტუნებდა. შეჯდომაში ხომ თითქმის არავინ გაიკარა ახლოს, რის გამოც, მეტი ღონე არ იყო უნდა ფეხები გაეკრათ და ჯერ ისე შემსხდარიყვნენ მხედრები. ვირი-კი გულში იცინოდა, ამბობდა: „ამ უტვინოებს ჰგონიათ, უნაგირის ხა-მი ვიყო!.,

მეფე ფრიალ კმაყოფილი დარჩა, რომ მისი მერანი ადვილად გაიხედნა. გაუხარდა ის ამბავიც, როცა უამბეს, რომ სადაც ეს ცხენი შევიპყართ, იქვე ერთი უზარ-მაზარი ხარი ირემი ვნახეთო და დააპირა ერთის კვირის შემდეგ სანადიროდ წასვლა თავის მერნით. უბრძანა მომზადებო მონადირეებს დანიშნულის დროსთვის.

გაიარა ერთმა კვირამ. მეფე თავის ამალით, ქორ-მეძებრებით გაემგზავრა სანადიროდ დანიშნულ ტყეში. გაუშვეს ძაღლები ტყეში. შეჰყვა თან მრეკავი. მეფემ ერთი გეზი ამოირჩია და თავის გარეულის ცხენით იმ გეზზე დაადგა. დიდ ხანს არ გაუვლია, რომ ძაღლებმა ყეფა ასტეხეს უღრანს ტყეში. მოისმა გრიალი. მეფემ ნახა რომ უზარ-მაზარი ირემი მირბოდა იმისკენ. ვირმა მაშინვე იცნო თავისი მეგობარი და გაივლო გულში, ეშველა მისთვის. ირემმა მტერი ვერ შენიშნა და თვალ-დაფეთებული, ყელ-მოღერებული წაადგა თავზე. ხსნა მისი აღარსაიდამ იყო. მეფეს დაქი-მული მშვილდი ეჭირა და ჰლამობდა ეტყორცნა

ისარი. ამ დროს ვირი შემოტრიალდა გვერდზე და ისარი ასცდა ზვალ-შავას. მეფის გული აღელვდა. ირემმა თავს უშველა. გაჯავრებული მეფე პირიდან ცეცხლსა ჰყრიდა. გადმოხტა ცხენიდან და იძრო ხმალი, — უნდოდა აეკუწნა ვირი, მაგრამ ისევ თავი შეიკავა. ჯერ ხამიაო, იფიქრა, ბოლოს და ბოლოს ეს მარცხი აღარ მოუვაო. მაგრამ მაინც უბრძანა თავის მხლებლებს, რომ მისი საფერხე კარგათ გაეწკებლათ, ქკვაზე მოეყვანათ. ვირი მართლაც ძალიან გაწკიპეს. სიმწვავისაგან რამდენჯერმე განიზრახა დაეყვირნა, მაგრამ თანაც თავის თავის გამოაშკარაებდა აშინებდა; ვაი თუ გაიგონ, ვინც ვარ და შეშის ზიდვით წელი მომწყვიტონო, იფიქრა.

შინ რომ დაბრუნდნენ, მეფემ უბრძანა, რომ სამი დღე და ღამე მისი მერანი უსმელ-უქმელი ღმერთინათ. ვირმა ტანჯვით გამოიარა ეს სასჯელი, მაგრამ უბაროდა, რომ თავისი მეგობარი, თავისი მსხნელი გადაარჩინა სიკვდილს. ეხლა თუნდა მოვკვდეო, ამბობდა ვირი, რაკი მისი სიკეთის გადახდა შევიძელიო.

VII.

იმ ქვეყანაში მეფემ გამოსცა კანონი, რომ ვინც ოთხ-ფეხს ცხოველს მიაყენებდა უზომო ჯა-

ფას, უზომო საპალნეს აპკიდებდა, უზომოდ დაუდებდა ურემზე საპალნეს, უნდა დაესაჯათ შემდეგის სასჯელით: გამოაბამდნენ მეფის ცხენს კულზე და ისე დააგლეჯინებდნენ

მეფის კაცთ ერთხელ შეიპყრეს ქუჩაში ერთი მევირე. უზომოდ ბევრი შეშა აეკიდა ვირისთვის, რის გამოც ვირი წაქცეულიყო. პატრონი სცემდა თავსა და პირში, მაგრამ ვირი მაინც ველარა დგებოდა ფეხზე, თუმცა-კი ცდილობდა ამდგარიყო, ბევრსაცა ხვწნოდა და კვნესოდა: ვირის პატრონი მაშინვე შეიპყრეს და წარუდგინეს მეფეს. მეფემ მაშინვე უბრძანა, რომ მოგბათ იმის ცხენისთვის კულზე ეს ახირებული ადამიანი. მეფის სასახლე დიდის მდინარის პირზე იდგა და წინ დიდი რიყე იყო. „მერანი“ ზედ იმ რიყეზე უნდა გაეშვათ და დამნაშავე იმ ლოდებზე უნდა დაეფლეთინათ ცხენისათვის,

გამოიყვანეს ვირი თავლიდამ. თვალებს იქითაქეთ აფეთებდა, ისე იყო ნაკვები. დამნაშავე მევირე დააშტერდა მეფის საფერხეს, ბარკალზედაც დააცქერდა და პირჯვრის წერა დაიწყო განცვიფრებულმა. ამ განცვიფრებას ვერავინ მიუხვდა. ყველამ ეს იფიქრა: პირჯვარს იმიტომ იწერს, რომ უკანასკნელს დღეშია და ღმერთს ევედრება, ჩემი სული კეთილად შეიწირეო. იმათ რა იცოდნენ, თუ პატრონმა თავისი ვირი იცნო და იმის

ბარკალზე თავის სახელი „სოლომანი“ წაიკითხა. რალა იქნებოდა, მევირე მოაბეს მეფის გარეულს ცხენს კუდზე და გაანებეს თავი.

— ჩემო მერანო, ჩემო საყვარელო ვირო, განა ისე გამიმეტებ, რომ მომკლაო! უთხრა სოლომანმა თავის მოძულეებულს ვირს ჩუმად.

— განა შენსავით უნამუსო ვარო, მიუგო ვირმა და ძუნძულით წავიდა, ისე რომ სახეც არ დაჰკაწვრია დამნაშავე მევირეს. წყალს რო მიუახლოვდა, იშვირა ფეხები და გაჰყვა მდინარეს. სოლომანი ვირის კუდზე ხელ-მოკიდებული ისე არხეინად მიდიოდა, რომ სიამოვნებაც იგრძნო, განადამც ტანის წეწვა-გლეჯა. ვირმა თავის ნაპატრონალი გააცილა კარგა შორს მეფის სატახტო ქალაქს და გაიყვანა ნაპირს, მშრალზე.

— წადი, ეხლა თავს უშველეო, — უთხრა და მოიხსნა კუდიდამ: — წადი და იმას მაინც ნუ დასტანჯავ, ვინც ჩემი მოადგილე გყავსო.

— ოი, შენ კი გენაცვალე, ჩემო მერანო, — ეუბნებოდა სოლომანი, — განა თავი უნდა დამანებო? შენ ხიამ ჩემი ხარ! ღმერთს გეფიცები, იმდენს საპალნეს, წინად რომ გკიდებდი, ეხლა მე შენ აღარ აგკიდებ.

— ჰაი, შე უნამუსოვ, შენა, კიდევ საპალნის, შეშის ზიდვისთვის მიფრთხილდებიო, — უპასუხა ვირმა გულ-მოსულმა და მიაფურთხა სახეში ისე

ძლიერად, რომ სოლომანი უგრძნობლად დაეცა
მიწაზე თითონ-კი გაჰკურცხლა ისევ ტყისკენ,

მეფე და მისი ნაზირ-ვეზირნი ღიდად გაკვი-
რებულნი დარჩნენ მეფის ცხენის საქციელით.

მაშინვე კაცები აფრინეს, რათა მიჰყოლოდნენ
მდინარეს და გაეგოთ დაწვრილებით, რას იზამდა
ან „ცხენი“, ან მის კუდზე მობმული მევირე.

მოვიდნენ, იპოვნეს კაცი უგრძნობლად მდე-
ბარე. ხოლო მეფის მერანს კი კვალიც ვერ მოუ-
კვლიეს.

როგორც იყო, გონს მოიყვანეს, მოასული-
ერეს ძველი ვირის პატრონი სოლომანი და მიი-
ყვანეს მეფესთან. სოლომანს გზაში ვირის ნაფურ-
თხალი დაუწყლულდა, ისე რომ საზარელს მუნად
გადაექცა. მეფემ ყველაფერი დაწვრილებით გამო-
ჰკითხა ვირის პატრონს და იმანაც, ღვთისა წინა-
შე, დაწვრილებით უამბო ვირის და თავის ამბავი.
აუხსნა, რისთვისაც იწერდა პირჯვარს, როცა მე-
ფის ცხენს კუდზე აბამდნენ, და განმარტა, რომ
ვირმა მომაფურთხა და ეს ფურთხი სწინელს
წყლულად გადაამექცა მთელს პირისახეზეო. მეფე
განცვიფრდა. ეს წყლული სოლომანს მთელს სი-
ცოცხლეში წყლულად დაჰრჩა: ვერა ექიმმა, ვე-
რა წამალმა ვერ უშველა. მეფემ შეიწყალა მევი-
რე, რადგან ეს „სასწაული“ მის თავზე მოხდა და
თვითონ კი მიიწვია ყველა მწიგნობარნი, მოგვნი

და ბრძენნი, რათა გამოეძიათ, ეს ამბავი რას მოასწავებდა. ასახსნელი იყო შემდეგი საკითხები:

1) როგორ მოხდა რომ ვირი, პატრონისაგან მოძულებული, შუა ზამთარში, შუა მინდორში თავ-განებებული, გადაურჩათ შეუქმელი მგლებს და ირმებს ჩაუვარდათ ხელში.

2) რამ შეინახა ზამთარში, რომ სიცივემ არ მოჰკლა და ან როგორ გაჰყვა ირმებს თან.

3) რამ მისცა ვირს ძალ-ღონე და რამ დაამზავსა ირემს, გარეულს რაშს და რამ მოუმატა ტანი.


4) როგორ მოხდა, რომ ვირი ცხენად მოეჩვენათ და თვითონ მეფემაც კი ვერ შეიტყო, თუ ის შინაური ვირი იყო, გაგარეულებული.

5) რად შეიწყნარა ვირმა თავისი პატრონი და არ დაგლიჯა, რადგანაც მისგან ბევრი ნაწყენობა მოაგონდებოდა.

და 6) რად გადაიქცა ვირის ფურთხი მოურჩენელს წყლულად.

შემოკრბენ ყოველ მხრიდამ კაცნი ბრძენნი და მეცნიერნი; იძიეს, იკვლიეს საქმე, მაგრამ ვერაფერი გამოიკვლიეს, ვერც თავი უპოვნეს და ვერც ბოლო, საიდამ მოხდა ასეთი საკვირველი საქმე. ბოლოს დაასკვნეს, რომ ეს ამბავი ქვეყნის დასასრულს მოასწავებსო, დღე-დღეზედ წარღვნა მოვაო.

ამცნეს ეს ამბავი მთელს ქვეყანას და ამასთან ერთად დიდის გულის ტკივილით მოელოდნენ ქვეყნის წარღვნა-წაღეკვას, მაგრამ ისე დაბერდნენ და დაიხოცნენ, რომ არცარა წარღვნა მოხდა, არცარა გადარღვნა დღეს აქამომდე, ასე რომ ამ ამბავმა ჩვენამდის ცხოვლად მოაღწია.



ს ვ ა ვ ი

I.



წახული იყო. მთა მწვანობდა. მალლა მწვერვალებზე-ღა მოჩანდა თოვლი, დაბლა ხევებში ზვავი. მწყემსებს გაერეკათ მთაში საზაფხულოდ ცხვარი და ძროხა, მაგრამ ბედს ემღუროდნენ: კირი გაჩნდა, აუარებელი ცხვარი და ძროხა იღეოდა, იღუპებოდა; გატყავებას ველარ ასწროდნენ; მრავალს წყლის ნაკადულებს სისხლის რუები მიმატებოდათ. ხევებში ზვავებზე, ბინების, ფარეხების გარშემო ოხრათ ეყარა მძოვრი. ფრინველთ და ნადირთ სანატრელი დრო დაუდგათ: ფარეშობდნენ უზარმაზარი სვავები, ყაჯირები, ორბები, ყვავ-ყორნები; დამაძღრები, ლეშით გათოშლები იქვე ახლო-მახლო კლდეებზედ სხდებოდნენ, ფეხებით, ფრთით თან მიჰქონდათ სისხლი და ასისხლიანებდნენ კლდის დეკას, ქუჩს, ურძნიანებს. (მთის მცენარეებია.)

II.



ქრთი გამაძღარი სვავი კლდის თავზე იჯდა. სიმამღრით ძლივს-ღა ქშინავდა, მაგრამ თვალეებს უფრო მამაცად ატრიალებდა და სულ-ხარ-

ბათ დასჩერებოდა უფსკრულში ლეშის გროვას.—
ხა, ხა, ხა! — თქვა მან სიცილით ბოლოს, — უყურე,
აბა, უყურე იმ ბრიყვს, იმ საცოდავს, იმ მატლს,
იმ ბეჩავს! ნეტავი ერთი ლუკმა მაინც გამოვიდო-
დეს და მერე ეთქვა ჩემზე აუგი სიტყვა, მერე და-
ვეძრახე. ღმერთმა შემარცხინოს, სასწორზე აგვ-
წონეთ, ძმაო, თუ ორი ათასი ბუღბუღი არ ავი-
წონო. ჰაერში რომ შევინავარდებ, გავშლი განზე
მხრებს, ათასი ვერსიდამაც კი დამინახავს ადამია-
ნის თვალი და იმ მლიფს, თუ თავს არ წაადგე,
ვერც კი დაინახავ თვალით; მფრინავი არავის უნა-
ხავს, თურმე ჯაგებში, ბარდებში ძვრება და
რალაცას ჟღურტულებს და ამისათვის აქებენ,
ჟღურტულებს თურმე მძინარა, თვალეზ-დახუჭუ-
ლი. ჩემი თვალების ტოლა არც კი არის, რომ-
ლებიც არა დროს არ მეხუჭებ და მუდამ მზათ
მიჭირავს საკმლის და მძოვრისკენ. ის კი ჟღურ-
ტულებს და ჟღურტულებს, საკმელ-სასმელი არც
კი აგონდება და თანაც ჩემს წყევლა-კრულვას დას-
ძახის არე-მარეს...

— „ყრაანტ, ყრაანტ“! — მოისმოდა. სვავის-
კენ მოსეირნობდა შავი ყორანი. ჯერ გაეთამაშ-
გამოეთამაშა გულ-ზევიადათ მჯდომარე სვავს, ფრთაც
გაუტყლაშუნა ფრთაზე, უნდოდა ზეზე წამოეგლო,
მაგრამ სიმძლვრით დამძიმებული სვავი რომ ვერ

დასძრა ადგილიდან, მის გვერდით. შორი-ახლო დაეშვა და ჩამოჯდა კლდეზედ.

— ყორანავ, ყორანავ! — მიუბრუნდა სვავი ყორანს და მედიდურის კილოთი დაუწყო კითხვა: — როგორაო? რას მიაშობდი იმ ღღეს ბუღბუღზე, ლამაზათ მღეროდაო? ნეტავი მეც ბუღბუღათ მაქციაო?! უჭკუოვ, უტვინოვ!

— ჰო, იმასვე გიამბობ, რაც მიაშობია შენტვის: მისი მღერა არ დამავიწყდება ჩემს სიცოცხლეში და არ დარჯერებ მისი სიმღერის გაგონება აგერ იმ ღღეს გროვასაც კი მიჩქვნი.

— აბა როგორ იყო, როგორ? მიაშბე! დაეკითხა კვლავ სვავი.

— მშვენიერათ გალობდა, მშვენიერათ! რამდენჯერ გავმადლარვარ ღღეშით, სხვა-და-სხვა ცხოვლისა თუ ფრინველის ხორციით, ჩემს სიცოცხლეში ისეთი სიამოვნების წამი არ გამომივლია; მაშინ კი, როცა ბუღბუღის მღერას ვუგდებდი ყურს, ჩემმა გულმა ფეთქა დაიწყო, მისი ძგარა-ძგური, ხმაურობა თითონ მევე კარგათ მესმოდა. მთელი ღამე არ დამდგარა, არ დაუსვენია. მთელი ჭალა იყო და ის.

— შენ ღამე ჭალაში რა გინდოდა? ამბობდა სვავი გაჯავრებით.

— მინამ მთაში ღღეში გაჩნდებოდა, ბარად დავდიოდი სადავლოთ. სანოვაგეს, ღვთის წინაშე,

ბევრსაცა ვხვდებოდი. დამეზარა მთაში წამოსვლა და ერთი ღამე ქალაში ვათიე ერთ უზარ-მაზრ ბოკვზე. იმ ღამეს გავიგე ის, რაც ჩემს სიცოცხლეში არ გამიგია და იქნება კიდევ ველირსო ბულბულის ხმის გავონებას. ამაღამაც იქნება წავიდე, აღაჯა მშია და არაფერი. წავალ, დავჯდები იმავე ბოკვზე და დავუგდებ ყურსა, დილაზე კი აქვე გაიხლებით. იმავე ხეზე, მეორე ტოტზე ყვავი იჯდა. თუმცა უგუნებოდ ბრძანდებოდა, მაგრამ თვითეულს სიტყვას ის მითარგმნიდა; მე მხოლოდ ხმა მომწონდა, სიტყვები კი არ მესმოდა. ყვავს ბულბულის ენა კარგა სკოდნოდა და დაწვრილებით მითარგმნიდა. განა არ იცო, ზამთარ-ზაფხულ ბარათა გდია და აღვილათ შეისწავლიდა.

— რას გითარგმნიდა, რატომ მეც არ მეტყვი? თქვა კვლავ სვამა.

— ბევრს რასმე, ვინ მოსთვლის! ყველა ვერ დავისწავლე, — უთხრა მას ყორანმა. — ცოტა რამ კი მახსოვს, აი თურმე რასა მღერის ბულბული: „ამოდით ყვავილნო, შვენიერნო, ტურფანო, დედა-მიწის ანგელოზნო, თქვენ დაგედევით მტლეთ, თქვენ გენაცვალეთ. უთქვენოდ ღმერთმა ნუ მომცეს ერთის დღის სიცოცხლე, თქვენა ხართ, თქვენა ჩემი სიცოცხლე. ტყეო, დედა-მიწის გვირგვინო, მუდამაც იხარე ფოთლით და ნაყოფით, მუდამ მწვანობდე, მუდამ ჰლალობდე და მე საბრალო

შენი მგოსანი გიძლერდე, ვაქებ-ვანდიდებდე შენს
შვენებას, შენს შემოქმედს. უმანკოება შენი ნუმც
შეიბლალეა რაიმე ცოდვით, რომ არაშეტირო მწა-
რეთ, გული არ დამიდაგო!

წყარონო, წმინდათ, ანკარათ მდინარნო!
რძეთ გადენსთ ბუნება, რათა ყველა ცხოველს მო-
უკლათ წყურვილი, დასაქცნობ-გახახმობად გამზადე-
ბულნი მცენარენი მორწყოთ, გაახაროთ, გაანელ-
ლოთ, თავი მაღლა ააღებინოთ; ნუ დაივიწყებთ,
თქვენი ჭირიბე, უკანასკნელს მატლს, უკანასკნელ
ჭიას, რადგან იმასაც სიცოცხლე წყურია. ნურც
დაიშრიტებით: იდინეთ იწანწკარეთ. თქვენ რომ გხე-
დაეთ, ჩემს გულში წმინდა გრძნობა და დიადი სი-
ყვარული თქვენსავითა წანწკარებს. უფალო, ღმერ
თო, აკურთხე წყარონი, აკურთხე ყვავილნი, და-
მილოცე ტყე, თქვენს მაღლს და დიდებას ვეთა-
ყვანე.

„მზეო, ყოველის არსის ნუგეშო, გაათბე, გაა-
ხარე ყველა შენის მადლიანის სხივით, ხო-
ლო ნუ დასწვავ, ნუ დაჰგვალავ, ნუ გააფუჭებ
კაცის და ბუნების მარჯვენის ამაგს; შენ, ნიაჲო
ციურო, მოეშველე მზეს, ერთად შეზავდით და
თესეთ მადლი ქვეყანაზე. „ძალნო ბუნებისანო,
მოგროვდით ჩემთან, მოისმინეთ მუდარა ჩემი: აგერ
სოფლები, აგერ ქოხები, იქვე ობლები, უბადრუ-
კნი, ბეჩავნი ტირიან. მიეშველეთ, მტირალი გაა-

ცინეთ, მშვიერი გააძღეთ, თქვენს ძალასა ჭ მადლსა!..
ახ საბრალონი! რამდენი ტირის, რამდენი ოხრავს
და იმათი ცრემლი კი ჩემს გულში ზღვასავითა
გუბდება, მე სულს მიხუთავს, სიცოცხლეს მიწამ-
ლავს.

„რამდენი მწყემსი ტირის და იმათ სარჩოს
ითრევენ სევანი და ყორანნი, უმსგავსნი, უმადლო
უკეთურნი ფრინველნი, სხვისა ცრემლით თავის მა-
საზრდოვებელნი, სხვის საფლავზე მოკიჟინენი.
მზარავს და მშხამავს იმათი მოგონება“. და სხვა-
და-სხვა.

— რაო? სევანი და ყორანნიო? — სთქვა სევა-
მა პრისხანედ: — იმისმა მზემ, სევაი და ყორანი
იმისი ცალი და ანათალი არიან, იმასავით მარტო
ქღურტულებენ და-ვერ სიამოვნებენ ამ წუთისო-
ფლის სიამოვნებით. რა ღმერთი გაგიწყრა, რომ მა-
შინვე არ გადაუხტი და თავი არ გაუჩეჩქვე იმ
წუწკს, იმ უბადრუკს იმას; იმდენს ვალაპარაკებდი
განა ჩემს თავზე, მე რომი ქა ვყოფილვიყავი?!, არა-
მი არ იქნებოდა მაშინ ჩემი სიცოცხლე ჩემს თავზე,
თუ მაშინვე არ გავგლეჯდი შუაზე?

ეგრე პირდაპირ რომ ეთქვა მშრალის სიტყ-
ვით, მეც ბარემ იმას ვუხამდი, მაგრამ ისე ლამა-
ზათ, მოხდენით ამბობდა, რომ გავშეშდი, კლანჭე-
ბი ხის ტოტზე მიმეწება, ნისკარტი გამიშეშდა;
დამამონა. დამაუძღურა. დარწმუნებული ვარ, შენ

რომ ყოფილიყავი ჩემს ალაგას, ხმას ვერ ამოიღებდი, კრინტსაც ვერ დასძრავდი. გავგლეჯდი კი არა, დღეს საღამოსაც იქვე უნდა წავიდე და კიდევ მოვისმინო ბულბულის მღერა და, თუ გნებავს, შენც წამობრძანდი, შენ ამოიყარე იმისი ჯავრი. ადვილია მისი მოკვლა, მისი დაჭერა. თვალ-დახუჭული გალობს მუდამ; დილით მე თითონაც ვნახე, თვალეზი ეხუჭა და ისე მოსთქვამდა.

— მე წამოვალ, — სთქვა სვამა — და ავ დღესაც დავაწვევ, გიჩვენებ იმის სერს.

— აი ვნახოთ, მომყე, მაშ წავიდეთ. — სთქვა ყორანმა. — „ყრაანტ“, გაისმა, ყორანი აფრინდა და მასთან ალახლახდა სვამიც და გასწიეს ერთად.

III.

შირ-ბინდმა დაჰკრა, როცა დიდს ქალაში, დიდს ბოკვზე ორნივე, ყორანი და სვამი, ჩაეშენენ, დალაგდნენ მძიმედ და არხეინათ დაიკეცეს მხრები.

კარგა დაღამდა. ყორანი თვალ-გაფაციცებული, ყელ-მოღერებული, მოუთმენლად ელოდა ბულბულის აჩქამებას. სვავს კი უმსგავსათ ჩამოეშვა ჩინჩახვი, მოეკუმა ნისკარტი, გაეფართხა მხრები და თეთრს ტომარასავით იღვა ბოკვის ტოტზე.

— რატომ არ გალობს, სად ჯანაბას წასულა

ის უმსგავსი, ოხერი?—სტქვა ბოლო დროს სვავმა,
—დაუყვირე მაინც, რომ ხმა ამოიღოს.

— მოითმინე, ცოტა ხანს, მოითმინე,—უპასუ-
ხა ყორანმა,—მე რომ დავიყვირო რას გავაგონებ
და, ვინ იცის, ძალ-დატანებით იმღერებს კი?!

ცოტა ხანმა გაიარა და ჯერ თითქოს კვნესა-
სავით რაღაცა ხმა შემოესმათ.

— აგერ, აგერ, დაიწყო, დაიწყო, — თქვა გა-
ხარებულმა ყორანმა,—დაუგდე ყური, ის არის
ისა, გალობს, დაიწყო, აბა ახლა შენ „ცი, რო-
გორ ამოიყრი ჯავრს!

კვნესას წკრიალი მოჰყვა ჯერ ნელა, ნელა,
დინჯათ და ბოლოს ამალღდა ხმა ღვთიური.

სვავმა თავი აიღო და თვალები გაახილა. გაი-
ჩმუჩნა. შუა-ღამემ მოატანა. ბულბული გალოპდა
და სვავიც „ოპ, ოპ, ოპ“! იძახდა:—მართლაც,
მართლაც გულსა ჰკოდავს, ყორანო!..

გათენდა, შეეყარა ბინდი ნათელს, ყორანი
მიაშტერდა სვავს და შენიშნა, რომ წუწიანს თვა-
ლებზე ორი ცრემლი მიჰკრობოდა, დაღვრემი-
ლიყო.

— აბა, ბიძიავ, რას აპირობ, მოჰკალი, თუ
შეგიძლიან. რას გარინდებულხარ, გაჩუმებულხარ?
უთხრა თავ-მომწონეთ ყორანმა.

— ფიქრებში წავედი, ფიქრებმა გამიტაცეს.
ალარ მინდა დანაპირები.

— მე ხომ გითხარი, ვერაფერს გაუბედავ-მეთქი. ხომ გახსოვს?

— მახსოვს და არც გიტყუენია, სთქვა სვამა ამოოხვრით.

შუა დღე აქნებოდა, რომ სვავი და ყორანი დიდს ხევში იხხდნენ გვერდის-გვერდ და ლეშსა წიწქნიდნენ.



